

遼陽縣志

戊辰夏  
比頌

詩賦志卷三十七

嘗讀十五國風詩貞淫正變辭旨攸殊孔子刪詩顧並存之者蓋列國政俗之純駁類皆發之於詩此陳詩採風太史之職所由重也茲編所列各作有屬地屬人之別要皆以本邑爲限清康乾時代遼歸陽詩家載之熙朝雅頌集中州集及清詩別裁者不少概見厥後瑤峯崛起雅有中聲仙樵西岡齋咨應節後先百數十年雅音一變其亦時勢所趨歟述詩賦志第三十七三十八三十九

遼城望月

唐太宗

元菟月初明澄輝照遼靄映雲光暫隱隔樹光如綴魄滿桂枝圓輪虧鏡影缺臨城却影散帶暈重圍結駐蹕俯九都佇覩妖氛滅

晚登遼海亭

金高士談

登臨酒面灑清風竟日憑欄興未窮殘雪樓臺山向背夕陽城郭水西東客情到處身如寄別恨他時夢可通自歎不如華表鶴故鄉常在白雲中

107400

曾公祠

明盧瓊

維帝御極柔遠能邇一夫不獲痾痺是似蠱茲遼人不戢自焚公憫冥頑任禍於身敷奏  
祈宥脅從罔究帝曰兪哉銑拜稽首渠魁以殲衆感以祐保茲東土如翼如覆帝曰都哉  
陟茲功懋銑拜稽首天子萬壽農不易業市不易肆以生以育惟公之賜維岡有柏維麓  
有砥繩之鑿之維公之祠公惟信宿留公之似我其夙夜罔不敬止匪我思之子子孫孫  
匪民私之既浹且淪匪公之惠惟帝之仁遼其奠安於萬斯春

由祖越過龍泉

明御史程啓充初亭

一徑何盤曲東西亦委蛇危巖嵌蘭若疲馬安能馳豈不憚峻險薄言恣探奇清泉濯長  
纓聊與性命期雅有杯中物可以樂我私

千山溫泉

明翰林學士唐皋

本爲觀泉到非緣愛寺遊祇看珠湧躍那有芥塵浮鐘定香仍散僧依境更幽浴餘能愈  
疾吾欲約吾儔

石罅源泉湧方池，罅欲流不緣陰火烈。那得沸湯浮造化，元相煽薰蒸豈自由。吾方厭塵垢洗濯，故勾留。

前題

明副使郡人 徐景嵩

萬世溫泉水百年幾度遊，炎流從地發煖氣。蹴天浮風過亭臺，爽山環景致幽。自憐多病客不是濯纓儔。

釣魚臺

程啓充

高臺臨大道，清溪水盈盈。長竿懸直針，聊以抒我情。水清無大魚，徒勞費香餌。數罟日漸密，哀哉魴與鯉。

同兵憲黃雨用諸公遊祖越寺留別

明苑馬寺卿張 鏊

使節約山靈，征鑣暫爾停。龍宮開翠嶽，鳥道上青冥。夜宿蓮花嶂，朝看貝葉經。酒醒啼鳥緩，花雨滿禪庭。

孤亭不忍別，更上翠微間。南海八千路，東遼第一山。杯前雲去處，席下鳥飛還。天遠無勞

問征鴻頻度關

羅漢洞

前人

拾級尋幽處苔沾屐齒香露華侵徑草朝旭上扶桑洞古蒼虬合鏡殘貝葉荒焚香一暝  
坐身意總相忘

秋夜宿千山祖越寺

明分守叅議張邦土

寺景逢秋霽鐘聲靜夕氛山青初斷雨壑暝半屯雲松裏千花塔碑間雙樹文懸泉尤可  
愛徹夜耳中聞

客興探幽境山容靄暮氣螺峯高並斗鶴樹直侵雲坐待松蘿月閒聽貝葉文乃知阿育  
教妙悟戒聲聞

過白塔寺

張鏊

白塔雄西寺黃金鑄佛身蓮花光日月貝葉歷周秦訪友勞投轄爲官愧積薪看君有高  
步早晚踏青雲

夜坐

明按御史周斯盛

尋幽知茂樹欲隱借重柯  
覆卵憂時去爲巢徹土多  
依人情不淺反哺意如何  
羽翮行看健飄飄日暮過

高嶺

王之誥

連山青嶂合車馬亦能通  
陟嶮疑登漢穿林乍蔽空  
鳥鳴幽樹裏花雜亂榛中  
隨處堪吟眺無勞歎轉蓬

閱邊至遼陽

巡撫都御史蘇志皋

海國風掀凍雪殘驚沙陵亂拂征鞍  
馬毛如蝟鬚如戟誰信邊城猛士寒

遼衢行

巡按御史溫景葵

日照千門物色新雪消山郭靜  
風塵閭閻處處聞簫鼓遼海城頭也有春

晾甲山

王之誥

英主當年定太平征遼曾此駐龍旌  
咸陽宮闕幾朝代土俗猶傳晾甲名

登遼陽鎮遠樓

兵部郎中張 弼

步上高城更上樓憑欄一望思悠悠山如圖畫催吟興海作杯椽蕩醉眸箕子故封今異域管寧舊隱是何州遙聞胡馬時南牧未請長纓愧白頭

登望京樓有感

故城西南角樓名望京

巡按御史 郭登庸

兩洗沙場殺氣收天涯秋暮獨登樓一方煙井聞雞犬百里晴郊散馬牛斷隴黃雲依古戍孤城斜日射寒流滄溟寂寞魚龍伏回首西南望帝州

和韻

給事中 薛廷寵

遼陽亦是先王地落日孤城獨倚樓南望青齊隔滄海北看豺獸遁沙丘珠簾繡柱秋堪眺宿霧殘雲晚未收回首蓬萊雙闕迥使槎何事尚淹留

又

監察御史 朱 篋

望窮京國二千里步上邊城百尺樓鬢鬢蒼煙橫朔漠荒荒敗葉下林丘金蘭契誼應難並玉燭動名早見收把酒憑欄無限思不緣歌管故淹留

又

巡按御史 史褒善

漫俯晴郊物色幽風塵荏苒共登樓雲開繡幙碧連海花映朱甍翠倚丘天畔客杯逸興  
遠沙頭樵唱晚霞收憑危極目燕山裏潦倒邊城尙滯留

華表柱 舊在郡司城內

巡按御史 楊行中

千年華表名虛在終古神仙事杳茫獨柱已非當日石斷碑空亂後人腸遠山青抹胡天  
碧蔓草<sup>光</sup>鋪野日黃鶴去不來惟鳥語故鄉<sup>城</sup>郭尙遼陽

遼陽考試漫成

巡按御史 劉 詒

遼海東風散曉寒杏花光豔滿毫端欣逢士集開方盛怕報春歸落未殘香入布袍偏繾  
綰影隨松蓋共團圞公餘忽憶當年事十里紅霞送目寬

平川喬道長邀登千山寓宿

明翰林侍讀 華 察

三月煙花雨後新韶光偏動宦遊人青驄遠踏千山雪綠柳先回萬壑春東海無波初見  
月西臺有主慣留賓夜深忽憶鑾輿遠指點星河望北辰



遊千山祖越寺

徐文華

東巖

堂隍迴合水潺湲路轉坡坳百折還上界鐘聲霄漢杳前山塔影夕陽間松濤漲壑千巖響花雨浮空滿地斑坐久虛堂疑誤入恍然身世出人寰

又

程啓充

初亭

佛閣高樓縹緲中此身應已在虛空天花亂落輕雲濕貝葉時翻細雨濛萬劫混茫真幻寂千峯回合失西東憑欄俯瞰塵寰杳更借金鑿刮眼矇

又

明前給事中劉

琦

北郭

路入千山小徑斜林丘窈窕轉周遮巖松宿霧常浮翠石澗流泉漾落花遠近峯嵐飛翠嶽高低臺殿隱谿谿共來不倦登臨興闕寂真堪謝世譁

次東巖韻

薛廷寵

萬壑雷鳴水勢湲千山落日鳥飛還勝遊况值秋重九高枕應分雲半閑月色空濛當戶白雨痕剝落染碑斑冲霄樓閣傳鐘鼓已覺塵蹤遠世寰

次北郭韻

朱 旉

路轉峯迴石磴斜，禪關長是白雲遮。  
月華祇道霜天晚，秋葉翻疑上苑花。  
山引樓臺連碧落，風傳鐘磬出嵌牙。  
野禽亦解聽經呪，羣集檐松靜不譁。

次初亭韻

史褒善

山川迤邐畫圖中，翠洗塵埃浩劫空。  
風弄秋聲飛葉度，雨收殘照落雲濛。  
浮生自識難違性，客路無妨轉作東。  
眼底物情隨意足，謾將旅泊厭紛蒙。

九日遊千山

朱 旉

冉冉旌麾郭外行，萬山秋色雨餘清。  
疎林落木年光晚，絕塞新寒雁陣驚。  
異域幾人同勝覽，天風爲我拂塵纓。  
白雲深處鐘聲動，知是山僧道左迎。

羅漢洞

在千山祖越寺

薛廷寵

羅漢洞天一徑通，煙叢林杪放行踪。  
海螺捧出雲千疊，錫杖飛來閣幾重。  
石澗長鳴曇雨落，香風不動法門空。  
逢萊未必能勝此，縹緲笙歌繞梵宮。

登千山寺

巡按御史李

輔近台

曲磴黃緣轉翠微，捫蘿攀樹叩禪扉。  
空巖積霧籠諸佛，高閣浮雲俯落暉。  
石壁半餘蒼頡字，山僧閑擁白雲衣。  
行人歲月風塵度，來向丹丘問息機。  
遠山紅日靄霏微，鐘鼓新晴啓曙扉。  
風裊篆煙清曉夢，露凝瑤草待春暉。  
羽旗捲霧催行色，畫戟飛霜照客衣。  
高臥何如僧入定，一簾松影了禪機。

秋夜宿千山祖越寺

張邦土

萬木蒼蒼一徑秋，行人迂駕獨巡遊。  
峯嵐佳處得禪境，松檜叢中忽梵樓。  
亂石雨餘泉溜響，空山日落磬音幽。  
誰知巖穴平生癖，今夕煙霞一暫留。  
千山宿雨霽新收，孤客積懷慰壯遊。  
篆壁煙消披古籀，簷鈴風細語危樓。  
晴花照水春如在，涼月浮空夜更幽。  
爲問萬松蒼翠裏，幾人曾被白雲留。

羅陀洞

即城東羅祖洞

吳希孟

懸崖萬仞通一路，洞門深鎖青雲樹。  
石髓何年結水蓮，巖齒當空滴翠露。  
野僧穿穴臥蒼

苔仙客攀林衝冷霧登眺恍然升半天亂散漁舟橫古渡

登羅陀洞

黃 襄

石壑丹霞迥世紛山腰鶴跡出人羣曉來先得半竿日夜靜偏眠一榻雲滿徑苔痕浴磴滑數聲僧語隔天聞何時解却黃金印獨乘山車演法文

洞口薜蘿覆徑幽諸天隔世遠悠悠半間佛寺石中起數點天花雲外收月靜偏看塵界海風吹不斷上方秋更憐雙樹無家客忘却形骸頗自由

望京傑構以下遼陽八景詩不佳姑存之

邵盛生 韓承訓

身在江湖心在廟登樓見日動長謠杖藜歎世意長苦授簡題詩興亦遙畫棟珠簾江渚

映城高徑仄旆旌搖憑高欲上呼閭閻遼水東西盡寂寥

廣祐雄圖

西北禪林出郭偏當階寶塔對金仙頂蘆月上光同照層鐸鐘虛韻獨傳立地却愁鼇背負凌霄應礙鳥飛還轉輪還是推來易誰與蒼生結善緣

太水環帶

燕丹昔日避秦兵，衍水今傳太子名。  
渠口遠從千澗出，邊頭近倚一川平。  
斯干自入維熊頌，如帶應同白馬盟。  
向晚渡前爭利涉，隔林煙雨棹歌行。

千山列屏

昔人見千山有五  
色氣云宜出狀元

層疊千山五寺藏，石門南面儼成行。  
銀屏冬去雪山關，錦帳春回金谷長。  
嵐暗虎龍深隱伏，氣蒸雲雨結微茫。  
無人拈出生花筆，辜負當年五色祥。

香巖佛夢

香巖高聳映中峯，左右坡陀建寺重。  
火宅無期僧自定，鐙朝有夢佛留蹤。  
笙簧松遠飛巢鶴，霧潭深睡伏龍。  
始悟無生原不染，頓令心地欲相從。

華表仙因

丁令千年已化仙，歸來軼事古今傳。  
泠泠仙語人民後，憂憂鶴鳴城郭先。  
石齧柱長苔青潤，露丹鑪絕火紫銷煙。  
秦皇漢武俱成誑，韶舞岐鳴鳳可甄。

首峯泉瀑 城古名巽平舊  
遼陽在邊外

首山地抱自逶迤遠望昂頭似建旗臺號青霄來不定泉飛白水去如斯因知魏將連營處並憶唐王駐蹕時惟有城名今異昔中原棄地使人疑

陀洞懸珠 在今太河寺

佛洞高深景物殊洞簷平湧石如珠只將金篋開蒙眼更揭尼珠照昧途在石恐隨雷雨動懸巖端與月星符登臨身在浮雲外為取瑤華詠步虛

過褒功祠 祠祀總兵韓斌

明戶科給事中 周金

宣室元勳舊列名功高河北受降城玉門不因將軍壘金甲空閱契利盟天子拊髀廊廟計鄉關血食子孫榮英風蕭颯遼陽道隴樹蒼蒼暮靄生

過代子河

王之誥

代子津頭泛野航澄波滉漾見晴光沙邊浴鷺矜毛羽天外冥鴻厭稻梁斥堠遠傳清塞鐸橈丁新架捕魚梁桐江兩岸秋容勝爭得逃名隱釣鄉

嘉靖甲子天子從羣議命將擁兵險山以讐服東虜明年秋八月余按部至此以立  
威之始故三致意焉

李輔

帝顧東陲烽火頻九重分闕下絲綸秦關夜勿留笳奏魏闕秋看屬鴈臣霜曉轅門吹畫  
角天寒斗氣動青燐扶桑詔許標銅柱

時除撲誘之  
禁令得窮追

莫遣天驕返隻輪

會飲西石中丞王公

李輔

百尺危樓俯大荒征衣吹動朔風涼石虬驤首侵霄漢鐵鳳飛鞏挂夕陽萬疊遠山開眼  
界一川流水自文章劇談况喜逢仙客銀燭金尊夜未央  
他年願識荊州面今日相逢遼水東勳業濟時千古事迂疏道學半生空山銜落照拖秋  
色樓倚高雲送晚風更約憑虛凌宇宙壯懷不減酒杯中

劉總戎春日園亭燕集

張邦土

元戎別業倚城隈乘興尋春客易來錦瑟欲依松籟度綺席却借石牀開深紅乍潤藥欄  
雨嫩碧初伏草徑埃向夕風光猶可戀花香月色徧亭臺

劉琨坐嘯掩茅衡細柳沈沈尙合營授法曾逢黃石老辭榮還比邵侯平園亭已自如仙  
境華表何須更鶴聲春圃花紅春酒綠羨君終日醉流鶯

聞警

周斯盛

晴沙落水痕胡馬不沒腹長驅窺塞垣呼雞鳴箕箒邊烽一縷傳三軍夜戎服上馬擁雕  
戈直擣陰山谷一合勢已披再戰如流湫驚沙電羽旗西風雨寒鏃牙鼓寧凱聲但聽秋  
原哭奧草宿郊垆頻年空杼軸糾察誠殷勤益重逃亡屋嗟彼登壇人豈不念推轂舉足  
失深谿桑榆難再逐犬羊日以驕燎原須早撲愁雲亂荻笳萬里虛修築雲中上首功瑣  
瑣奉公牘雁門日椎牛千金奚頻顛雄略睹猶在志機不盈掬拊髀當明時請纓非碌碌  
誓堅銅柱心飛食玉門肉幕南絕王庭麟閣千年肅

輓遼東楊將軍照

明兵部尙書楊博

夜半將軍出陰風滿路隅刺心期報國瀝血果平胡遼海濤聲慘閭山景色孤泉臺何日  
起聊爲致生芻



百戰稱雄畧胡中早著名將星何事隕天意杳難明獨抱三韓節誰當萬里城樞垣東望處不覺淚沾纓

遼陽歌十首

張鑿

胡塵靜掃古營州遼水謳歌億萬秋紫極西懸雙日月凌雲高起望京樓

城西南角

帝掃妖氛紫塞清龍江渤海洗天兵橐駝北走奇雲散鐵鳳城春萬柳生

樓曰望京

遼王阿保機改

龍虎軍中大將壇千峰如戟出雲端春來帳外看山色萬斛空青白日寒

遼陽爲錯鳳城

首山西望鬱崔嵬黃屋當年駐蹕臺爲報昭陵雲樹道朝宗春水鴨江來

萬山獵火嘯烏桓日日呼盟血未乾黃髮小兒同涕淚何時飛將斬樓蘭

寶婺西沈王母池白雲應有赤松師何人更踏金鰲背海客空題石上詩

遼陽春似洛陽春紫陌花飛不見塵莫惜萬金拚一笑幾回裘馬換新人

戰罷長休十萬兵平原座客滿朱纓恩深寒夜春如海明月歌鐘到五更

挾彈呼鷹並玉鞍芙蓉寶劍醉中看寸心白日論知己愁聽高歌易水寒

槐市春陰度玉墀深閨啼鳥夢驚時機中文字心中淚一日情添百尺絲

鄭女歌

并序 事另詳

程啓充

嘉靖庚寅中丞成公保釐東土崇文閱武區吏宣化首詢節概以風四方乃廣寧衛上狀  
鄭女行實公偕節鎮王楊二公曰王風既熄道化陵夷斷廉殞恥且不免於士流矧夫女  
子云鄭女未歸而鬢篤操節行繼今垂白而不渝生平是豈易爲者哉既聞於上表厥宅  
里復屬余爲辭以播諸金石義之所激固將興起頑懦仁人之心淵乎逖矣遂爲鄭女歌  
其辭曰 鬱鬱醫巫山高不可攀浩浩多正氣盈盈天壤間珠琳琅玕相蕩射精華不  
獨歸金石百年鍾秀有伊人使我聞之長太息鄭氏之女年未笄問名許聘孫郎妻合歡  
未奠雙飛雁悲風吹斷青雲梯地老天荒不相見寒盡春回共流轉殘生甘作未亡人洗  
却鉛華謝釵釧斑斑血淚染衣裳可能化作紫鴛鴦悽悽切切抱長恨朝朝暮暮閩山陽  
閩山自今古女心良獨苦誰將斷草根栽作連理樹鄭氏之行真可哀祇今不見青陵臺  
龍章鳳詔天邇來表揚宅里光昭回芳馨漫汗逼上台眼中脂韋俱塵埃鬚眉之客徒雄

猜翻雲覆雨何爲哉

遊中會寺

明修撰龔用卿

寺遠山僧少叢林草徑深懸崖盤石磴古殿度雲岑  
枝密迴流合巖幽向日陰欲將金印卸瀟洒定禪心

宿大安有懷

明給事中吳希孟

奇石蒼松世界分千山虎豹散狼羣洞前黑白萬林雨  
壇上浮沈一篆芸漏盡鐘隨莊室蝶心依神會柏臺雲  
清樽舊約逾三月何日參軍細論文

墉鼠行

張升

張綱不畏狼馮婦不畏虎胡爲舉世人獨畏穿墉鼠  
鼠爪豈如虎爪強鼠牙不如狼牙長虎在深山狼在野  
爾鼠何得居高堂太陽當空稍退避隱爾形身藏暗  
昧黃昏未及暮雲橫即肆奸回須得志掉頭瞋目步  
如飛呼曹引類趨庭闈厨下先飡供祭肉架間復嘯  
及時衣翻盆覆鉢貪饜甚東館西軒遊已盡粉牆畫  
壁任穿窬躡閣登臺誰復禁有時忽到

繡牀邊並頭蓮葉枝枝殘金鍼綵綫不知處雙鴛折作孤飛鸞有時潛入書房裏萬軸牙  
籤盡銷毀瑤琴錦瑟無十絃圖畫珍藏半陵替有時侵入篋笥中吳綾蜀錦紛如蓬湘縑  
雲箋皆失素粉囊脂盒餘殘紅太倉歲積千鍾粟留待荒時備饘粥爾心那解識天心曉  
夜侵漁未知足嗟爾鄙鼠欲何爲虎狼猶有束縛時一朝主母生嗔怒大縱狸奴捕捉之  
健兒紛紛擣巢穴火焚水溺窮搜索丞相憂懷自此紓廷尉按問猶深責爾身已見眼饑  
貓爾子爾婦將焉逃臧獲怒爾帝帝切齒磔爾皮骨燃膏脂人性何嘗殄天物爾獨於人大  
肆毒世間好惡本同情何處偷生改營窟

捕蝗謠

明韓承訓

遼無蝗嘉靖辛酉蝗始西來人驚見之恐遺種將不可斬往歲金復民流至此遂有海蜩  
螂到今爲農害今蝗必有招致之者劉向占謂禾養民如賢蝗食禾爲害室賢之應然遼無  
賢將不在民乎作謠以志之

朝捕蝗暮捕蝗去何處來何方遼地三月花不芳冬寒遺唾結冰霜遷氓流卒愁死亡當

年聞蝗未見蝗翩翩衡雁近隨陽北飛往往先春翔人言遼地似蘇杭我願塞上寒如舊  
蝗不來兮免饑瘦

巡幸遼陽

清聖祖

肅將軒駕向遼陽暖日晴薰百草芳照野山川皆動色掀天旌旆自生光林間蒼蘚侵人  
徑城上新花綴女牆欲問襄平舊郭郭千年華表鶴飛翔

駐蹕遼陽夜深對月用唐太宗遼城望月詩原韻

夜氣澄炎景清光渡海碣流雲漸稀朗繁星粲如綴蟾殿魄初明冰輪影未缺懷古聽行  
漏素心良蘊結曠然望九霄妖氛盡殄滅

廣祐寺

禪宮多歲月瑞塢積風煙翡翠苔碑陪珠璣寶相傳馴簷來紫鶴湧地出青蓮微雲輕埃  
洗花晨興獨偏

寺創於唐時中  
有自來佛殿

入千山

曉入千山路煙光織翠蘿崎嶇綠石磴宛轉歷巖阿樹杪朱旗出藤陰玉勒過物華看亦好景色愛濟和

祖越寺

青山橫古寺羽旆陟層巔地僻茅堂小橋危石徑穿夏條含嫩葉春卉發餘妍寂寞空林午時聞鐘磬傳

龍泉寺

狹徑纔容騎香臺欲起龍懸崖千仞落斷碣百年封泉細通幽壑庭深暗古松臨高一騁望積翠靄重重

遊千山登瓔珞觀

御史郝浴

照海一千峯參差如潑翠我行一玩心敢謂養神智煙霞入衣裙庶用清寤寐瞥看雲生處翻身若摩翅斯須款其間乃是高明位精廬架九霄天可揖而至不怪挂瓢人憑將軒冕棄推窗遠岫來一一如擁篲青靄諸峯和白飛萬壑肆猶記客秋來紅紫紛如醉霜風

日夕生蕭然本色出歷落見茅菴彷彿開十地琅琅梵聲發謾謾松濤沸世道在神州悠然興遠思得無有救拯巨細爭一臂常恐遮人倫於此常遜避泉石雖幽遐安忍極深邃寄語愛山人斯言不無意

羅漢洞

郝浴

松雲攢護間杳然得翁受拄杖看巖額中有尊者某應是愛飛行當翠鑿戶牖深入幽轉明一氣通前後最後結窗櫺下窺萬壑陡日輪漸南來不吞已到口就中諸聖僧屈指各二九嗔笑皆慈悲雖怪不爲醜拂塵起摩索始信仁者壽松聲入耳根胸中渾刷垢愛此清涼居薰風自爲帚抖擻出前岩再坐洞門口仰視巖石掀怒出壓雲母旣壓而復翹俯仰盡諸有五老立階下純用大夫守左壁擁高隣蒼茫以背負萬松多於毛碧青那可數一松一精舍一石一春白雲來石如雪雲去松似綬真可作覺林而爲菩薩敷明月的的來何苦紅塵走若解作巢由愈令稷契厚齋戒發經囊薰修看耆耇即不出一言亦自有真趣紫翠罩羣峰風月恣汝取可惜好巖壑著處蟠蚪蚪一抹白雲封經年無人扣

金剛峯

郝浴

林麓穿不徹都爲蒼潤封線天當路豁滿插青芙蓉高華無與極云是金剛峯低徊禮其足脚山日已春來朝把名香追尋智者蹤踈踏瓔珞下雙手一當胸萬峯爭秀發一鶴下青松偶睨金剛巔渠反跂而顛伸手頂可摩委如抱足龍乃知此間大衝突盡包容區區一拳石不足問倨恭人天有巨眼無爲金剛壅

祖越寺至羅漢洞

山頂有無梁觀

府丞 呂履恆

空山寂無聲鐘磬自生響宛轉松石間忽來雲鳥上筋骨未遑安耳目已豁朗巖腹正中穿出入隨俯仰混沌誰開鑿玲瓏非意想仰視縹緲峯天表撐一掌其上有飛觀安能度表廣自非餐霞人邈然不可往

望千山

清高宗

我聞古來稱奧區必有名山爲作鎮况茲遼陽實天府羲經已兆帝出震長白巫閭衆所瞻千山亦復高千仞設在晉郊魯甸間太華泰岱應齊峻我來謙邑攬形勝南望巒岈映



青潤朝嵐夕靄儼相接巒光峯態如堪引龍泉祖越久聞名靈蹟相傳半疑信何時長嘯  
眺滄海千仞岡頭衣試振

遼陽懷古

清高宗

唐宗戰壘久成空管邴曾聞度海東只有千年華表鶴時看來往白雲中

欲遊千山不果

清高宗

念結龍泉祖越間遊期又復爽千山如憐倦馬當秋瘦且付枯僧抱月閒坐可披圖悟離  
即恍如對瀑聽潺湲終須臥象諸峯側霜磴煙蘿取次攀

遼城望月用唐文皇韻

清高宗

呈象湧滄瀛見光先渤碣桂樹吳剛修不放枝外綴散彩麗霄漢示冲表盈缺於時踰中  
秋廣寒徒念結夙興偏宜觀漸向西林滅

寄題千山

清高宗

千山勝景久薺哉三度徒教寄詠迴

三臨盛京皆  
欲至而未果

本異唐宗曾駐輦

相傳唐太宗曾駐蹕於此然彼以征高  
麗而過其處予三次皆因謁祖陵而來

事既不同且此地在唐僅爲遼西以外邊郡今則爲祖宗創業故都建置更不同也

空傳丁令有遺臺

山有仙人臺或因丁令威得名

底須石徑花巖

皆千山名勝

到原匪探

奇問景來却笑前遭泐崖處侵尋應已漉莓苔

懷舊

故大學士兼江南河道總督高斌五曹臣之一

清高宗

高斌初爲內務府司員雍正四年任蘇州織造歷遷布政使河南副總河兩淮鹽政兼江寧織造十一年春皇考命其就近學習河務署江南總河余即位後令實授河督尋調直隸總督擢吏部尙書授大學士又以大學士兼管河南總河十八年以河員應追核減之項聽其遲延又淮水決邵伯二閘罷職留工自効二十年卒於工念其爲宣力舊臣敷歷年久予內大臣銜二十二年南巡復念高斌爲總河時頗著成績如毛城舖所以分洩黃流於徐州設水誌必至七尺始開後人不用其法遂致黃弱沙淤隱貽河患至三滾壩洩洪湖盛漲高斌堅持堵閉下河亦屢豐其功在民生自不可泯雖張家馬路及運河二閘不免果於自信而瑕瑜自不相掩本朝河臣雖不及靳輔較齊蘇勒嵇曾筠殆有過之因命與靳輔等同列河壩祠祀復原職高斌存心忠厚且以理學自

居人頗方正其辦河務實能體國抒誠不涉虛偽食報宜不爽其在綸扉未久而治河之績彰彰可考因於督臣中致念云

本朝善治河靳輔齊蘇勒斌實可比靳弗徒保工急至其於齊也有過無不及齊惟以保守隄民大局初

不計也惟是閉三壩自信過於力下河曾受福異漲害亦迫斌力主堵三壩下河固受其利然遇清水盛

五堰洩下之水高寶兩湖至能容高斌仍不肯啟放車運南關等壩致洪流衝突潰漲亦執而不變癸酉秋洪湖異漲其自高堰

決隄岸不特下河被灾即濱運河高寶各縣亦胥受其患則咎有攸歸因治高斌之罪用此抵以罪勸懲國之則然終

諒其心與祠復原職壬午復南巡清口親定式預折東西壩頻年已受益壬午南巡閱視清口因

清水比誌增高一尺則折清口東西壩十丈視其增長尺寸隨時展折兩壩俾資宜洩為釜底抽薪之法及

水減退仍按誌以次鑲築酌留口門二十丈自定水誌以後河臣如法展拓清口連歲有收下河受益於高堰五壩定水誌如

漲因逼無已徐啓壩未至衝潰棘使斌而有知應歎初未識昨秋豫省黃河漫溢歸入淮河勢甚浩瀾

拓清口並於各開壩酌啟洩水薩載遵旨盡展清口兩壩六十丈又先啓山盱智信兩壩復啓仁義禮三壩並將南關車運昭關各壩

同時開放運河兩岸始保無虞雖下河不免稍受偏災然減下之水較之衝決勢緩故患不至太甚且豫籌賑卹民皆安堵情斌當日

未見及致有癸酉之失也

懷舊 故大學士兼兩江總督高晉五督臣之一

高晉斌之侄也初任知縣洊陟山東運河道乾隆十四年擢山東按察使明年遷安徽

布政使二十年擢安徽巡撫尋協同白鍾山辦南河事二十六年授江南河道總督三十年擢兩江總督命統理總河事三十六年授大學士仍管兩江總督兼總河高晉歷封疆三十年勤以奉職誠以任事尤能整飭吏治盡心民瘼吏不敢欺而民愛之蓋由縣令起家於下情無不深悉也其治河頗步趨高斌效其純而去其偏故無少愆失凡修防疏築諸事皆實心經理當今曉河務者無出其右昨秋豫之祥符儀封黃河漫溢奪溜堵築非姚立德所能任因敕高晉率河南諳練將奔馳往董治乃兩處漫工屢塞屢開績久弗就高晉憂惶成疾日益危篤尙書袁守侗郵奏即遣侍衛攜太醫院使往視並諭以安心調理醫至甫數日竟不起聞而軫悼優卹有加入祀賢良祠並爲輓祠惜之高晉老成敦樸體用兼優實督臣中之傑出者雖爲閣臣而未辦閣務故仍列於督臣高晉長余數歲而精力未衰不意遽以勤事歿深歎賢臣之淪謝矣憶余初踐阼時大臣皆長於余且多皇考所簡用今竟無一人即有長於余者悉余所拔擢而年小於余者亦間有彫零此懷舊之詩所爲作也

從來擢督撫德才量並重以此下僚中平百不一二中自知縣起者臻是必超衆晉也實其人故悉下情洞更兼習河務要任久倚用乃以治河決來豫久稽功叶憤懣因致疾不起誠堪痛歷歷懷舊臣中外資經綜而予未歇肩顛俊期與共

思賢詠

巡撫馬雄鎮坦公

鑲紅旗漢軍謚文毅

彭紹升允初

康熙九年坦公巡撫廣西設方略平寇盜革除苛政與民休息十三年將軍孫延齡應吳三桂反勒兵圍巡撫衙以三桂命遣坦公衣冠坦公朝服自經家人救解乃遣僕賀徵子世濟先後潛遁齎書詣闕請兵陳破賊計又遣次子世永孫國楨詣京師延齡覺劫坦公幽之土室坦公自剄不殊絕粒數日不死居四年延齡與三桂貳三桂遣其孫世琮襲殺之收坦公營中勸之降迭進飲食坦公推案大罵賊怒先殺其二子脅之坦公奮起奪二子頭擊賊賊遂殺坦公其從者九人交口罵賊賊并殺之子婦董氏妾顧氏劉氏及其二女世濟妾苗氏皆自縊夫人李氏次第視殮畢北向九頓首亦縊奴僕從死者十有八人事聞贈坦公太子少保兵部尙書賊平敕建雙忠祠於桂林祀坦公

及將軍傅宏烈

慷慨歷三死請兵氣何豪可憐土室中骨肉傷漂搖嚼齒罵未絕頸血濺兒曹齊心一尺

組蟬蛻同逍遙

錄測海集

思賢詠

河督斬輔紫垣

鏤黃漢軍謚文襄

彭紹升

康熙十年紫垣巡撫安徽安慶頻旱民多流亡紫垣奏豁水荒田賦四千六百餘頃招徠流民次第安集因請募民開荒行溝田法報可時河道大壞河水北決宿遷沐陽海州安東諸州縣南注洪澤旁決下河七州縣清口運道盡塞十六年詔紫垣以兵部尙書總督河道相度河工喟然曰河之壞極矣是未可以尺寸治也乃上疏請濬清江浦鑿清口引河以暢淮流塞高堰決口使束淮有力築黃河南北岸使水歸故道疾下海口廷議難之固請聖祖從其議逾年功成黃淮安流二十三年疏請開中河三百里導山東之水自運達黃俾免橫決下流悉被其利嗣以論治淮安下河與羣議異爲言官所劾遂罷三十一年復起故官陝西饑命督南漕二十萬石沂河餉蒲州以賑饑民使

還得疾亟疏陳河工善後策又請豁河工廢田之糧并清涸出新墾熟田之賦遂兩疏  
求罷得請卒於官嘗著書論古今治河成敗之故甚具方紫垣用事時論者多持異同  
其後上屢下詔稱其功至今論本朝治河者必首推紫垣

治水古有方曰行所無事南河主北流無乃昧時勢隻手障狂瀾萬井安樹藝平生已溺  
心豈恤道旁議

思賢詠

光祿寺少卿楊麟靜山

漢軍正黃旗人

彭紹升

康熙中官直隸固安知縣故事修永定河秋汎畢工興時永定道黃賦役錢不均遲延  
及冬朝涉者股戰靜山憐之許日出後下鑿黃巡工遲民之來欲答之靜山力爭不得  
乃直前牽其馬至凍處曰公能往民亦能往此時日高春公重裘尙瑟縮乃責此赤脛  
者戴星來耶黃大恚將牒劾靜山會巡撫李文貞公過柳家口聞之召謂曰汝年少能  
然古之任延也勞以酒解裘衣之事得釋調宛平聖主巡畿南過固安老幼爭乞留靜  
山聖祖曰別與汝固安一好官何如一女子曰何不別以好官與宛平耶聖祖大笑以

爲誠許食知州俸知固安縣尋遷雲南曲靖府調麗江麗江故苗地中甸新歸版籍靜  
山召土官爲典史諸里魁以頭目充令人樹榆一本畝畜水一溝建文廟定婚喪之制  
期年歲熟俗爲之一變民飾廟以祀號第一太守祠累遷西安布政使署湖北巡撫調  
四川乾隆初以言事罷官七年起甘肅涼莊道遷光祿少卿致仕歸

好官若珍珠得者懼或奪誰能塵如傷太息此無褐春榆映檐低秋水衝渠活迢迢闇昧  
區天日一朝豁錄測海集

### 自千山至雙峯寺

遼陽州 陳學海

寂寂雙峯寺門開石壁間花垂紅籠綬峯疊碧孱顏古木隨僧老孤雲帶鶴還世塵不到  
處勝地得躋攀

過遼陽城訪故傳臚王瑤峯同年宅并索齒錄及其遺稿

和瑛大芬

和瑛係蒙古人額爾德特氏諡簡勤有簡易齋詩鈔

華表峯高宿草局杳無鶴唳到空庭青年昔共趨三殿

辛卯曾試今  
四十年矣

白髮今存聚五星

庚午冬予  
與馬朗山



邵海圖鄭秋圃李雲門會於京  
都俱年近七旬同年存者五人

有靈

千里關山慚挂劍一門衣鉢許傳經  
青田不沒生前草滄海遺珠信

### 遼陽州

江西新建字叔度謚文達 裘曰修

襄平遺壘此初經一水依然走百靈  
劫火銷餘千頃綠戰塵飛盡四山青  
舊京尙識龍興地仙蹟難尋鶴化形  
極目海天縹渺外寒雲漠漠雪冥冥

### 千山

裘曰修

我生愛水兼愛山山山出地猶人間  
茲山夙聞在天上覲面何肯辭躋攀  
歇馬步入祖越寺羅漢古洞相資緣  
探幽縋險下復上獅口一綫光初穿  
最上云是臥象脊縷縷細路愁猱猿  
眼中彷彿見遠水島嶼的的撐如拳  
樵人拾級更前導嵌空舊刹臨龍泉  
挂天一瀑噴白玉照海千朵開青蓮  
山僧睢盱揖客坐稜稜瘦骨來癯仙  
爲言山中五大寺大安中會棲東偏  
中有仙台號絕勝香巖路杳埋雲煙  
石梁架鶴凡數折况復冰雪連孱顏  
我言斯遊願已足未可恣意稽韞軒  
向來奇境豈有此相與歎詫卑中原  
別山欲去還俄延愧

無好句留山巔我嘗恭讀御製集天情往往超塵寰前云華泰應齊峻後謂且付孤僧閒  
翠華兩幸未果至幾經念結形詩篇山兮會常邀玉趾我亦扈蹕期他年集中二詩照天  
壤名山亦藉詩俱傳山靈聞言似慰意松濤響答聲翛然寒風日晚吹我前徐徐理轡回  
險鞭尙餘一事懷抱牽束欲奮飛無羽翰從來可望不可即巖巖長白萬古高於天

龍泉寺

清鎮國濼厚公高 塞敬一

梵宇起中天重巖響碧泉虛堂清曉露幽壑靜鳴蟬窗引螺峰翠松含象嶺煙空憐名勝  
地塵世幾高眠

宿香巖寺絕頂

前人

雨霽空山夕尋幽入杳冥雲封千澗白露濯萬峯青飛鳥依簷宿流泉伏枕聽朦朧空翠  
裏孤月自亭亭

宿向陽寺

前人

聖朝存象法古寺復聞鐘花引山門路雲開野殿松高齋談靜理遠嶼淡秋容日暮還攜

杖月明林外峯

遊千山祖越寺登蓮花峯

前人

七嶺行初盡千巖宿霧開路迴青嶂側寺入白雲隈洞戶聞清籟碑文暗綠苔蓮花天際出漸覺絕塵埃

梳髮謠并序

英廉計六

永聞上人有母事菴中色養惟謹老而病臂上人晨起長跪為梳髮蓋十餘年如一日穀齋李八異其孝寫圖以贈之余題以詩

烏兮反哺羊兮跪乳西方之人兮豈無父母一解昔依佛如母今事母如佛佛耶母耶兒不

知長跪母側理母髮二解母梳髮兒方小兒梳髮母已老母髮如絲兒心如草三解無母有母

無兒有兒兒耶母耶無諸有諸胡不思諸四解

邊方

前人

邊方氣候異明晦怪多違一片午雲起滿城秋雪飛移時成小雨過處尙晴暉客况勞斟

酌寒颺乍有威

憶弟

靳治荊

熊封

又見亭皋木葉殘，幾回清夢遶鄉關。  
棗梨熟後詩曾寄，鴻雁來時人未還。  
舊業縱饒書卷在，新愁難放酒盃閒。  
晚衙纔罷疏鐘動，一倍相思損客顏。

登鎮海樓

佟寧年

靜公

永嘉節鉞臨南武，飛閣峻嶒接太清。  
五嶺插天遮百粵，兩江歸海匯三城。  
悲風落日邊笳壯，秋色長空北雁橫。  
東望蓬萊方咫尺，憑虛直欲御風行。

過寧海諸嶺

劉廷璣

玉衡

日行不滿百數里，三度嶺直上最高峯。  
白雲生俄頃，下瞰後來者遙遙。  
在深井怪石蹲道旁，猙獰羣獸猛。  
老樹獨縱橫，勢若虬龍騁。  
憑高呼僕夫，戒心各相警。  
世路太嶮巖，眼前多幻景。  
清風吹客衣，斜日淡秋影。  
薄宦逐天涯，忽忽雄心冷。

重陽前一日寫懷

前人

世有倔強翁髮白畏言老幾人取卿相鏡中朱顏好我生自有天生意非草草無心慕輕肥亦不薄溫飽事事聽自然所愧未聞道光陰赴壑蛇蹤蹟歸林鳥肯以一寸金等閒付懊惱來日是重陽雁信秋風早黃酒盃盈盈菊枝風裊裊怡悅取及時強飲開懷抱

立春前一日偶賦

前人

纔報春回寒欲輟此時便覺風光別一池旭日半潭雲來朝消息今朝洩楊柳欲柔東面風梅花亂點南枝雪有情天地爲幽人一年好景從新說

東平道中

前人

聞說東平路橫行盜賊多祇緣頻水旱况未息干戈鳥雀荒村聚豺狼白日過馬疲兼失路薄暮意如何

晚投諸葛莊

前人

白草荒煙淡蒼山古道斜雁將天作路鳥以樹爲家日暮樵歌返秋成社鼓搗一帘茅店外邀客醉黃花

新昌縣

前人

匹馬西風路禾香已在田民窮瓦屋少縣小石城堅野犢眠秋草荒雞唱午煙回看經宿處山與白雲連

奉化道中柬施明府

前人

百里孤城晚秋風上野航谿聲爭亂石山色變殘陽宿鳥全依樹農夫半在場使君清且簡茅屋慶倉箱

遠宦

前人

日落灌嬰城秋風白髮生河翻西去浪雁帶北來聲往事勞心夢流年遠宦情回思堪一笑何者是動名

除夕過石柱橋

前人

行李無多半挈書早圖安枕問華胥路貪稍近羣由徑橋畏新欹獨下輿雪盡雲山仍瘦削春遲草樹尙蕭疎紅箋兩幅柴門外猛記今宵是歲除

剡谿舟中

前人

十旬碌碌道途窮，纔出稽山又剡中。  
小艇正宜三尺水，破颿斜受半邊風。  
驚人沙鳥橫空白，帶雨巖花隔岸紅。  
焉得身輕閒領略，謝安蹤蹟在谿東。

武林喜晤張敬止中丞賦呈長句

前人

詔可林泉著舊臣，深衣拂後了無塵。  
欲抽身處何須老，未罷官時已覺貧。  
上谷自饒乘興事，西湖同作再遊人。  
悠悠笑酌梅花酒，宦海風濤漫問津。

古詩

佟世思儼若

鬢鬢萬里雲，浩瀚長江水。布颿揭中流，蕭蕭北風起。  
出門聽驪歌，車馬填街里。丈夫志四方，慷慨治行李。  
不畏行路難，願言酬知己。憶昔古之人，高義曾如此。  
飲馬螺山陽，結客從茲始。

清明誌感

前人

國門三月青青柳，萬樹千株灞河口。  
清明時節半陰晴，同人走馬攜尊酒。  
相期尊酒坐春

風人歌人哭夕陽紅流鶯睨深深處山色桃花暮靄中有女如雲淚如雨大道無言恨  
終古萬里長城無定河兒夫遠覓封侯苦一身許國誰能保白刃殺人如殺草漠漠寒沙  
古戰場夜臺日黑無昏曉故鄉明月照重闌空城深夜來青燐健兒百戰一時盡白骨如  
山不辨人少婦紅顏空有夢夢中一束寒衣送清明酌酒向窮邊歸骨無時佳節慟我聞  
女哭心悽然願天布雨洗烽煙烽煙一洗歸戍卒但有春遊無野哭

侍家大人入贛雜感八首

前 人

一水通章貢淒風送客航空山聞落木孤鳥下斜陽半載迷行旅千秋冷戰場不堪沙浩  
浩猶見陣雲黃

甲士環相衛河流一綫通人行層樹裏山插亂雲中風雨鄉關隔干戈別淚紅老親憂日  
切忍向指歸鴻

路入蒼茫裏朝光一望連村雲生遠樹江雨淨寒川岸竹青搖水山花香滿船炎方知漸  
近十月草芊芊



南去增悲嘆縱橫羣盜生蠶叢張萬弩鳥道走孤城半壁無完土三年未罷兵倥傯何所見只聽鷓鴣聲

舟次萬安縣寒郊生野蕪通城無爨火冷署集飢鳥問俗心如擣栽花事已殊所欣年正少珍重向前途

河石峻嶒起問言十八灘萬峯齊抱水一雨悄生寒舟緩迂山出天空仰面看何須悲蜀道此地已辛酸

急水行難進寒原日已沉雁分危嶺下雲壓廢莊深樹黑鐘傳寺山荒虎在林所悲不可道萬感夜來心

節鉞新臨蒞巖城正荷戈鴟聲呼夜月燐火照水河赤地蠶桑盡蒼山烽燧多天心應厭亂搔首意如何

仲宣樓

前人

我亦依劉者蕭蕭四望同城吞江水關樓插楚天空白日迷荒浦黃沙失故宮不知千載

下誰復泣秋風

偶興

朱倫瀚  
涵齋

谿山澹秋色薄煙去疏林一雨快新霽涼月照鳴琴泠泠石上泉悠然清我心對此良夜光迢迢憶知音

中秋夜獨坐

前人

見慣他鄉月寧知此夜長家書經半載客夢近三湘露氣寒於水蟾光皎若霜山窗接黃鶴莫送笛聲涼

早發固關

前人

路入雄關早木秋幽州迢遞度并州三秦城郭仍天表兩晉雲山到馬頭寒瀑遙隨殘月下空林斜帶斷煙浮經年旅舍聞雞舞絕塞崎嶇幾度遊

武昌秋興

前人

黃鶴高樓聳碧空晴川傑閣漢陽東雲吞夏口三秋雨颿挂天門半夜風城郭夾江懸一

鏡山川分勢走長虹遙憐赤壁煙波外落日寒沙照眼紅

九日吳大總戎馮太守招飲半江樓

前人

一天風雨到山城卻喜登臨半日晴亂壑聲喧江漲急殘陽光射海波平庾公豪興今重見謝守風流舊有名笑我彈冠對卮酒蕭騷霜鬢不勝情

邯鄲道上

客路三千作意長當年曾此夢黃梁而今白髮渾如雪又策征鞍過太行

廬山觀瀑

李瀚  
受川

倒挂銀河水飛空匹練來深宵明月照終古石門開絕壁噴晴雪陰崖走怒雷匡山讀書客誰是謫仙才

九日登滕王閣

秋風秋雨又重陽心寄遙天雁一行地有名流難作序客逢佳節易思鄉百年兄弟茱萸會幾輩詞人翰墨場南浦西山鎮相識敢將才筆繼三王

渾源州

高 斌東軒

八水源泉河

磁峽渾源神谿等八水台而渾流注桑乾

河流日向東千峯雲嶺路一逕雁門通山蓄元靈氣人涵太

古風冀方沾聖化帝力頌無窮

登雲龍山

前 人

雲龍峯獨秀靈境接彭城亭與人俱古

東坡放鶴亭

山因寺得名重來驚舊雨

甲寅春將登山遇雨不果

一上喜

新晴賢守饒風韻蘇隄自可成

秋日次西林先生韻

前 人

天高露下近清秋荏苒年華事業浮守職何能期范呂讀書初識學程周空齋自詠詩成

帙涼夜懷人月滿樓紅樹白雲看正好行將策杖碧山頭

眞州巖署五十自壽二首

前 人

江上重來聽曉鶯年華大半寄詩情四方有志惟男子五十無聞畏後生靜對停雲憐舊雨夢回殘月憶長征樂天知命吾將老何事孤懷尙未平

永日江樓坐翠微故園回首願偏違未探理窟難言命深歷官場始悟非鶴舞松間聊小  
憇鷗翔雲際本忘機欲求寡過存吾順讀易東軒待夕暉

春日靜海九華菴恒中和尙來訪欸留話舊二首

前人

二千里路不言遠七十三翁老未衰得得來看河上使相逢好爲賦新詩  
回首長歌亦可憐挑鐙重話舊因緣九華三宿題詩後小住江南又十年

夏日海防閱工書所見四首

前人

薰風炎日歷長隄茂草龍蔥路欲迷似喚勞人聲最好綠楊深處鷓鴣啼  
行趁微涼曉月妍清光一縷徹長川偶然自解詩中意月在河心影在天  
遍地蒲蘆葦蕩營邨邨籬落見花明海隅風物扶桑近咸有葵心向日生  
海日初生萬井煙相迎童叟盡歡然使君騎馬經過處笑指篝翁是地仙

懷友作

長海匯川

素雪颺清輝層光流疏楹中有苦寒士彈琴激商聲大絃淒以澀小絃急以清聞者咸歎

息彈者傷中情怫鬱不能解沈吟思遠征所思在天末陽雁哀哀鳴輟絃悲離居慷慨懷  
生平霜天逼陽和凍草回春榮心儀石蘭花終古抱餘馨

觀陸叔平花鳥圖

前人

屋上杏花如寫生屋頭飛下雙鳩鳴田家正爾望春雨對之能不開心情此畫得之金閭  
里兩岸高樓管絃裏上方殿閣化人宮畫船簫鼓山塘水垂楊繫馬青樓前舊事浮雲憶  
往年畫外春風畫中思白頭白盡杜樊川

奉國將軍曉亭上巳日偕同人集城南馬射賦詩見寄爰爲短歌和之 前人

開緘五色雲氣盤新詩不啻圖中看解道長安多少少年人馬馭運隨東丹茜纓珠帽衣霞  
紈金羈照耀鯨皮鞍各逞絕技鳴錫鸞馬射磬控能騰騫高者猿躍低翔鳶飛鶻沓發敦  
弓彎月且馬蹏矜便儼堵牆夾路旁人觀春風一線驚沙寒吁嗟乎青海凍雪何珊瑚我  
聞早晚破樓蘭猿臂封侯良不難少年早度祁連山

登吳山

前人

極目層城外蒼茫遠眺中山雲開晚照江雨宿殘虹犀甲三千在銀濤一派雄何堪思往事煙草沒吳宮

遊牛首

前人

曠絕城南路牛頭勢欲分寒林雙闕寺野火六朝墳拜佛看心鏡繙經對白雲閒僧共幽  
暎鍾阜下斜曛

答易淑南見贈

前人

芳草湘波淨新篁解谷陰騷人不可見古意抑何深雙鬢梁園雪孤燈楚客心感君千載  
意白首聽清音

秋雁

前人

萬籟入岑寂蕭蕭過雁行秋邨人自老谿館夜生涼明月白如水西風欲度霜封書能達  
否一寄古瀟湘

對酒二首

朱孝純子頌

昔登太行山落日望大河滔滔東流水千里揚洪波洪波去不返人生能幾何逝者不可  
追來者倏已過對此金尊酒慷慨當悲歌

早起攜壺觴徒步出郊坰松楸鬱蒼蒼高冢何崢嶸手持一杯酒澆彼古墓塋墓中不解  
飲君何不自傾在世未爲樂身後同冥冥且盡生前歡日飲三千觥

將遊峨嵋戲示諸同好

前人

我身依寥廓四顧心茫茫忽與飄風會而爲浮雲翔既欲窺錦壘又將泛瞿塘聞峨嵋  
山下照青衣江浮煙變朝暮積雪寒青蒼上有神仙宅中通玉女窗猿鶴來報書招我遊  
虹梁山僧拾橡栗爲我具餼糧我將采靈藥一吸沆瀣漿儻偕赤松子攜手排天閭左持  
羲和鞭右挽牽牛箱秘書受丹訣五色垂文章日月不我淹寒暑不我戕樂哉千萬紀乘  
雲朝帝鄉

同人鐵佛寺看梅醉中放歌

前人

此地未必無名山金珠紺碧堆其間此地未必無名水日夜笙歌逐羅綺何年有此鐵佛



寺茫茫遠自唐之季墮碑遺址無復尋松柏參天走雲氣前臨黃土岡青山相映蔽一色  
梅花爛漫開斷橋流水非塵世有如彼美絕世立鉛華不使污佳麗揚之人士愛者誰我  
與諸公結幽契坐久時參鼻觀香忘相悠然識真意春酒難盡還復斟夕陽已挂西山岑  
我思爲古佛不然化作梅樹林鐵爲骨兮冰爲心蒲團作我松之陰更買竹西十千之美  
酒歷三萬劫長酣吟

登日觀峯觀日出同李文園學使作

前人

天風夜墮飀飀聲陰霾塞路火不明文園先生好奇者攜我上踏天風行振衣飄飄拔日  
觀崖谷咫尺不能辨羣動此際息方深子夜機樞猶未判倒視孤亭前亭影亦倒懸白雲  
沈臥不肯醒千崖萬壑如堆綿我欲蹈之風大寒萬綿鋪浪長如川忽聽天雞鳴茫茫割  
昏曉緣天一綫白如遶日浴鯨波生海島海氣黑與天摩盪有物銜之不得上倏騰倏溺  
勢久危一躍撇波千萬丈此時半空飛曙霞白雲化爲句漏砂或如鳥舒翼或作龍騰拏  
或爲破衲中擘絮寶光徧散陀羅花憐渠點髻青山小猶向宿雲懷裏抱風引之去空濛

濛碧海三山接縹緲人生世網間塵土埋盤餐耳目不周大地外見聞一一皆駑頑造物  
只此基化理浮生只此通元關先生觀物靜且妙諸爲屏息叅先天嶽頂可騎風騷更看  
雲日澄新鮮

江漲行爲資陽故令張君作

前人

三日大雨江波裂城脚水深六七尺五日十日江魂驕城頭白浪如人高故令築城城不  
起鄉民輸工負薪米金盡石崩乞補難到此辛勤半流水君不見畢宿臄江星搖搖猶動  
尾昨朝漂泊東村田浮耜汨甑無人煙今朝衝去西鄰屋哀哀婦子吞聲哭一城不得完  
千家涕汎瀾一城不完猶可築千家性命誰能贖不才也是築城者百雉盤空羈五馬黃  
金豈惜傾家資愧不將身爲大廈來朝日出江城孤勸君負畚仍荷鋤不辭胼胝手足瘡  
要令鐵壁撐雄圖江妖水怪休前呼奠安海宇生民蘇

登江樓有感

前人

終古青山寺危樓百二尋江天幾朝暮風雪此登臨踰踰雄心在牢愁白髮侵故園煙樹

外遙望一沾襟

海嶽菴

前人

昔讀高人傳今登海嶽樓空江殘月白寒雨暮潮秋雲樹迷瓜步風颿下石頭年來漂泊  
意愧爾水邊鷗

題蒼巖雨秋草堂

前人

貧病相憐慣尊前感慨存一身仍草莽雙鬢老乾坤山影常橫榻河聲直到門惟應結茅  
屋同此閱朝昏

上元夜與松期觀察話別

前人

今夕爲何夕他鄉望故鄉只愁天上月併作鬢邊霜征路忘南北離亭慣短長惱人春色  
草賺盡馬蹏忙

赤水河

前人

萬點黔山色盈盈隔此波請君真絕域仗劍下長河崩峩烏蠻路蒼茫天馬歌瀾滄江水

外兵氣近如何

將作南遊留別都門同學四首

前人

胸蟠萬卷氣如虹海內文章有數公此日艱難成遠別他時懷抱與誰同相思南國登臨日回首西風旅病中那更醉眠秋一葉臥聽寒雨打孤篷

我被饑驅汗漫遊客心先逐水東流飄零何處逢秋雁蹤蹟真堪伴野鷗山靜鷓聲迎建業月明颯影下揚州三更敲破還鄉夢歌板誰家倚畫樓

扁舟萬里下風湍天塹蒼茫雪浪寒橫笛臥吹滄海上片颿遙挂白雲端自嫌野性輸雞肋誰向煙波問釣竿明月鄉關成遠憶側身星斗望長安

遠遊况是悲秋日弔古還慚作賦才北固南徐虛相像鄉心客夢重低徊大江白晝魚龍出古驛黃昏鳥雀迴多少羈愁消不得暮雲天際一登臺

大風登燕子磯

前人

振衣長嘯倚天風千頃江流一望中颯共鼉鼉爭晚浪人如鳧雁在晴空飄飄短髮凌雲

綠冉冉長裾落照紅興會平生消不得撇波思欲駕飛虹

釣臺二首

蔣攸欽

約園

拂袖東歸物外情那知隱後轉成名當年若問歸來意甘向漁磯寄此生  
天子何妨是故人桐江煙月樂吾真胥潮亦重先生節不遣衝波過富春

過辰州石門關

佟鳳彩

高岡

石門壁立與天齊古木陰森一望迷人迹半空驚語墜馬唬隔澗帶雲躋峯峯相應爭鳴  
谷水水重連襯仄蹊秣馬登臨鄉思遠夕陽斜挂界亭西

同遊千山詩序

王爾烈

瑤峯

四月四日蓬萊王君潤溥遷安徐君淳叟濟南李君龍文同郡楊君君實趙君文源石君  
瑞昌金君燦章暨吾家杏邨叔穆齋兄皆如約而集惟敬哉劉君己有成約既而以家事  
不果來戴君釐東以有職守亦未預余乃偕諸君及翰鰲二子少長共十二人出城南車  
騎迤邐由隆阜嶺至七嶺午餐於旅舍日夕至龍泉寺擇西閣爲棲止之所自龍泉次及

原书缺页

原书缺页

遊千山舊作錄奉芝圃同年雅鑒

王爾烈

吐符應生 龍泉寺北高峯舊刻此四大字款云隆慶二載巡遼御史盛泰字題人皆莫解其義五峯僧十六景詩序知其大意而未詳所出余考蔡伯喈所撰陳太邱碑有云峨峨崇岳吐符降神侍御所題蓋本此亦取大雅崧高之義五峯遂以本朝龍興當之余謂侍御係勝國臣不應及此然已爲之讖矣

磨崖深刻字青蒼三百年來義莫詳嶽降文宗周大雅吐符詞鑄蔡中郎峯頭日早扶桑

近 此峯高於諸峯日出先照之

石竇泉高玉井香 峯之旁石罅中出泉爲瀾纓泉最清冽

星使徒驚神秀在豈知王業肇東方

龍泉寺

前人

鳥引花迎到寺門翠屏環擁紺宮尊一千峯裏烟霞勝十六景中圖畫存絕壁時懸雲外屋怪松皆走石間根來遊總向西堂宿瓊島虛舟愜夢魂

舟爲額

以懸之

西閣度懸崖之上室狹而長如舟然每晨起雲海蒼茫儼片帆在蓬島中也余故題云瓊島虛

西閣瓶峯

前人



西閣依雲築孤峯近砌斜石無凡土壤松帶古烟霞翠壁倚天劍青鬢簪佛花臨窗得奇

絕歌詠興無涯

據松鶴老人遊記西閣孤峯其上小松數株佶屈如畫時康熙癸酉己距八十餘年猶小松也

丁酉秋張蘭谷招遊龍泉寺夜中得雨泉韻清佳因賦春句即謝蘭谷

長

前人

龍泉之龍去爲霖泉不自潤收清音竭來招提已三至流水空對無絃琴金錢敬卜神如  
既夜半淋浪聞枕上曉來群山擁濕雲松根石罅波激蕩開唇鼓吻龍作聲鈞天樂作虞  
球鳴入耳喧騰轉幽靜到眼活潑還晶瑩此時鬣龍吹細籟白帝驂龍颺風旆巨象呼噓  
獅子鳴噴雷翻雪衆聲會入夜禪龕龍吐珠羣仙影動聞瓊瑤夢榻渾忘身是我莊生蝴  
蝶飄蓬蘧一雨成奇伊誰力欲問山靈山默默此日相招飽意歸惠我豈惟多酒食

祖越寺

前人

祖越多奇境天工亦幻哉茨山七聖入蜀道五丁開岡迥鳥邊去洞深秋氣來自無顛倒  
念不上煉魔臺

彌勒峯

前人

寺內高峯如巨人垂腹跌坐據松鶴遊記爲彌勒峯今寺僧亦不知其名矣其上刻四大字曰獨鎮群岳又刻曰含澤宣氣人皆莫解余按道家玉匱經云黃帝封蜀中青城山爲五岳丈人蓋羣山之崇秩一月之內羣岳再朝此則所謂獨鎮羣岳者也蓋青城丈人取其形似而此峯亦宛像彌勒故借以爲贊其曰含澤宣氣又取春秋說題辭之說山之爲言宣也含澤布氣調五神也按黃庭經注五神謂五藏則取此以言彌勒之垂腹與前四字相發明耳然則皆出於僻典緯書徒以驚惑世俗殊無足取故特揭其所本以與來遊者共爲一噱云

彌勒高峯像宛然坦懷跌坐衆峯前烟雲久飫彭亨腹文字誰劔混沌天山半僧歸猶喜客松陰榻靜且逃禪午鐘一飯山蔬飽乘興還尋十丈蓮

無梁觀在蓮花峯上今人莫知自  
羅漢洞北望之其形儼然函者也

又爲前題刻者解嘲

前人

峯外奇峰松上松神仙應向此間逢穿林真見來香象守洞時聞嘯老龍玉匱流傳黃帝事青城髣髴丈人封遊人果有看山眼五岳何難一腹容

來鶴亭

前人

祖越寺南山有亭舊無題榜寺僧名曰接官亭余以其名俗甚易之以此丁令威係本郡人而千山並無其蹟未免闕如即以補之

襄平城郭近山垠丁令威來華表存五利不聞留姓字千年何獨覓兒孫靈波渺渺雲烟

盛京志令威學道於浙江靈波山

幻僧槍纍纍草樹繁誰共青山不生滅鶴來應爲問真源

大安寺

前人

深簷層崖蛇虎居短衣匹馬過來初高峯磊落荆關筆幽徑嶽崎莊列書雙闕洞開蒼壁迴萬山奔赴紺宮虛松林無復當時盛猶想濤聲興有餘

仙人奕棋臺

前人

天風吹輕衣縹緲在絕頂碁聲若可聞欲上梯痕迴俯視屏嶂開層疊青碧醒萬象羅吾前所歷皆炯炯荒碑紀丙午零落難細詢摩絮未忍去苔斑漢彝鼎忽看峭壁來高力破溟滓下臨無底壑石稜劍戟挺奇險動心魄長嘯驚儕等

香巖寺

前人

仙蹤獨向此中潛樹色山姿異所瞻畫筆誰能工皴瘦雨牕恰好襯廉纖碁臨滄海千年

局奕碁臺於此寺為近石煉紅塵百丈炎雪菴有煉魔石惟有白雲惜青翠常將輕靄護峯尖

雪菴碑

前人

碑在寺之東廊後大樹下屹然露立額篆金公雪菴墻碑六字尙完好餘多不可辨其未剝者字類聖教序頗可觀而未行歲月模糊難識傍有前明斷碑言其事頗詳以為唐太宗遣使賜碑按盛京通志雪菴為元時人何以言唐是必有誤疑而闕之姑以俟考

青山閱滄桑人與泉流逝碑以詔來茲片石功非細探奇入千山稽古感興替榛莽披龍蛇苔蘚積連綴坐臥讀其間半皆隆嘉歲尤多萬歷年衰晚恣壯麗最後至香岩屋後樹翳翳貞珉屹然存字有褚虞勢所識十二三餘者難審諦歲月已模糊悵悵覓無計一石若有知斷爛出草際曰維唐貞觀航海使星詣雪菴異蹟聞賜予有嘉惠厥賜碑與牌碑

以表禪慧環山爲之田牌以爲符契斯言殊可疑附會滋謬戾金公本元人何以云唐帝  
殘闕未可論姑使雲烟衛

奇穆齋煩揚雪菴碑

前人

丁酉余服闋入都時三通館方購四方金石遺文獨缺遼左余即致書穆齋宗兄煩其  
訪求能揚之人共往撫之既而所揚者非此碑因前書未言其何處也乃復寄詩促其  
復往求之詩內確指其地皆穆齋舊遊之所特未留意於此耳

重煩登陟不辭疲片石當前竟未知久剝歲年元易誤忙裁書扎致多疑千山最古推斯

剝百代何人識此碑猶憶摩挲苔蘚處牆陰幽翳樹參差

碑在  
牆陰

龜鱗屹立未欹斜字勢軒昂虞褚家學士頭銜耐雨雪

碑前有翰林直  
學士銜名數字

金公額篆足烟霞遠尋

空費遊山屐細揚惟成畫足蛇廊背雪菴碑即此良工可惜用心差

非關舊事欲翻新往蹟應憐撲面塵不辨元隋俗士誤何知今古野僧淳神猶相護踪仍

在石不能言字可循同志于思

石瑞昌多巖  
是知碑處者

今暇否但邀此往不須詢

雅興應仍在賢勞已共知更尋樵徑去相約食瓜時真面須重認深根自可披揚聲聞憂  
憂泉響和澌澌秘閣思添帙郵筒敬寄詩非君成勝事屬望復誰居

有皇慶二字其疑始定  
乃進於館入金石錄矣

### 登觀音閣

閣極高其上處中道一轉極險左為高壁右乃深壑雖不過一兩步而投足處止容半  
趾寺僧前導以帶拽之乃屏息以過既過皆悚然同遊金公至戰慄不能成語

履險如夷藉此心從容身已到高岑鉢盂歷歷依丹竈鸚鵡翩翩向竹林碑字模糊苔作  
篆琪花芬馥葉成陰

閣地平坦有屋址二三間有碑積苔斑駁花陰  
滿地丁香玫瑰尙開餘者茂密多不能知其名

何時微志能粗了手結茅亭抱膝

吟

### 觀煉魔石

此為雪菴煉魔石較祖越者尤險由夾峯曲洞而上至石所已難故但云觀焉而已

仙人堂下路嵯峨密樹牽衣偃僂過身到夾峯迴不得面臨危石詫如何孤僧打七經風

雪 有碑記雪菴事云打  
七煉魔常坐不臥

衆客參三畏薛蘿豈爲煉魔來此地詩魔翻恐更增多

余遊千華屢矣詩頗多不能盡錄其中有因舊蹟淹沒與古刻難解或絕險人所難到者爲之表發考釋因以詩紀之今錄以質芝圃或有所許可乎芝圃曾讀書祖越寺二  
年有詩自書一冊藏於寺後僧寮燬其冊止存焦尾矣余知而索觀之因携歸欲還芝  
圃使補其闕字而更錄之今尙未能以待異日可也瑤峯王爾烈謹識

書汪氏雙節傳後 蕭山汪氏雙節堂贈言叢刻

王爾烈

二女同居多異志兩賢相遇眞家瑞家瑞偏逢變坎坷賢女空悲共蕉萃汪君同室曰王  
徐浙水清門著節義自昔之子號宜家厥後良人厄遠地瞻望毋兮目豈瞑哀弱子兮孤  
誰寄莊姜戴媿無猜嫌趙姬姝隗均禮誼含悽且作未亡人戮力同肩未了事風雨冥冥  
唬虎驚籬壁簫蕭魑魅肆凜冽冰霜足禦侮殷勤針黹還供匱冬夜夏日寒暑長機筐書  
篋無時置高堂終年子有成地下報君妾無媿賢哉患難有同心嗟乎傳聞爲酸鼻福堂  
應以陰隲酬弱骨何必鬼神忌齊年雙嫠穴同歸百死孤生空血淚閨中嬰白豈爲名身

後鼎牲匪我思君恩逮下靡有遺孝子顯親無弗至吾爲賢者歎餘生何以報之爲良吏

*[Faint, mostly illegible text, likely bleed-through from the reverse side of the page.]*



其間多有不能言錄其中有因循流弊古語此等語  
衣冠者雖以詩記之今錄以實芝蘭或有所許可乎芝蘭曾遊  
年有詩自設一齋藏於寺後信空憊其間止存尾矣余知而  
而此種文字而更說之今尙未能以得愛日可也嗚呼士

書江氏書傳傳注

下

其間多有不能言錄其中有因循流弊古語此等語  
衣冠者雖以詩記之今錄以實芝蘭或有所許可乎芝蘭曾遊  
年有詩自設一齋藏於寺後信空憊其間止存尾矣余知而  
而此種文字而更說之今尙未能以得愛日可也嗚呼士  
其間多有不能言錄其中有因循流弊古語此等語  
衣冠者雖以詩記之今錄以實芝蘭或有所許可乎芝蘭曾遊  
年有詩自設一齋藏於寺後信空憊其間止存尾矣余知而  
而此種文字而更說之今尙未能以得愛日可也嗚呼士

詩志卷三十八

浣花草堂

癸巳

劉文麟仁甫

錦官城西四五里光燄萬丈衝霄起猶有詩翁故宅存行人遙向江頭指我來時值暮春  
天瞻拜遺容一憫然那是先生游息處滿庭芳草綠如煙乾元年中多變故劍南山水留  
人住背郭臨江結草廬春花秋月空延佇垂老無家兩鬢霜長安北望思茫茫關山帆嶼  
愁千丈詩句悲涼淚萬行蓋世文章慳一飽滿懷忠愛何人曉灑水遺居冷暮雲耒陽孤  
墓沈荒草自古才人多數奇側身天地一長思浣花溪上花開落溪水悠悠無盡時

閒門

前人

閒門深掩淨無埃雨過空庭長綠苔睡醒偶聞幽鳥語吟成恰值好花開名能傳後應須  
福性不宜時但愛才螿黠蟬愚俱可笑何如且盡掌中杯

林亭

前人

林亭幽意少人知長夏閒居事事宜荷葉一池鷺窺釣松花滿地鶴聽碁貪看遠岫簾常

捲愛就涼陰榻屢移偶醉即眠醒便起綠芭蕉上寫新詩

擬唐人從軍行和趙又邨

湘

前人

結髮事長征煙塵久未平萬魂刀上血雙淚笛中聲料敵秋防磧追逃夜拔營要令南牧者不敢近邊城

貳師寵未極明詔意如何蟻蝨生金甲塵沙暗玉戈威尊人命賤功少主恩多戰骨無歸日傷心天馬歌

太白垂天象光芒晝不收馬鳴魚海月人老雁關秋絕域睽鄉訊深閨入塞愁應開邊土盡征戰始能休

少小并州住英名冠一軍突圍開月暈斬將動星文命蹇侯難得功高主不聞淒涼烟閣上圖畫亂紛紛

讀漢高本紀

前人

論心畢竟負韓彭史冊虛傳大度名漫認定秦三尺劍已拚分楚一杯羹風雲聚散悲諸

將禮樂存亡付兩生  
繇叢事成皇帝貴朝儀從此不須更

定軍山謁武侯墓

甲午

前人

席捲中原奮壯圖  
蒼蒼宰木忽嗚烏  
祇疑此內藏龍蛻  
可惜從前殞鳳雛  
神鼓不聞寒雨濕  
靈旗空閃大星孤  
惠陵千里精魂接  
地下君臣有恨無

女媧墓

前人

蒼山圍繞若環玦  
中有女媧藏骨穴  
穿墳怪樹百丈枝  
入雲欲攫青天裂  
當年崛起鴻濛中  
大手補造天無功  
荒荒落日照山石  
頗疑鑪火光猶紅  
黃土搏人偶遊戲  
生齒日繁心各異  
如今人世缺陷多  
借問補救當如何

湯陰謁岳祠

前人

風馬雲旗似有神  
英兒烈女盡無倫  
山川靈氣生名將  
今古奇情鑄佞臣  
一代乾坤冤獄壞  
一作了千秋俎豆故鄉新  
騎驢老病西湖上  
未信蘄王是恨人

抵故里作

前人

我生十一齡隨爺客巴蜀今及既冠年還鄉省骨肉北方地早寒芳草不更綠下車入里  
闕一步一躑躅迎門見弟兄登堂拜伯叔共慰風塵勞絮語翦殘燭翌晨謁比鄰鄰言家  
釀熟留我酌一杯新霜採園籜道子去時栽手指庭前木

華表柱名未

前人

<sup>步</sup>止上南山道華表何巍巍昔有鳥來集自云丁令威一去三千年至今不更歸人民固屢  
易城郭亦已非仙人且化烏冢骨何所悲

管公邨

前人

公去吾安放遺蹤不可求空山容避世廢井幾經秋德盛愚頑格身歸姓字留祇今九州  
內無地著龍頭

松山懷古

前人

陰風射面勁如弩日暮觸體作人語客行過此心淒然駐馬山頭一懷古當年龍起東海  
頭長劍西指燕雲愁援邊甲士十三萬軍師誰實爲人謀殺氣搖山鼓聲裂一片潮紅頸

中血祇道元戎已致身思陵御祭文嗚咽君不見賈莊之戰盧尙書橫刀躍馬聲大呼事  
由中制不可說一死報主捐其軀又不見潼關之戰孫白谷喪師禍自監軍促滿門碧血  
土花寒身受國恩終不辱嗚呼丈夫志業殊尋常隨時變化致侯王與其抗刃作虎燈何  
如建鉞稱鷹揚榮華一瞥東流水留得動名照青史名在武臣傳非是心忘故主恩盡忠竟讓同  
人死往事回頭蹟已殘悲風蕭索滿河山聖朝不忍築京觀曩日誰收戰骨還我作此歌  
歌當哭陣雲四起飛燐綠後先雖異感慨同重唱松山哀一曲

放言二首

前人

那得飛乘破浪風壯夫久已困雕蟲觀魚且學濠間客失馬翻思塞上翁士不易爲三代  
下人多虛活百年中祇今縱棄毛錐子算到封侯恐術窮  
莽莽塵沙匹馬馳年來衣色漸爲緇幽花并雪千鍾酒蜀棧秦關數帙詩伉爽情懷孤劍  
照飄零蹤迹斷蓬知平心細想安身法願向鶴鷄借一枝

游匡山太白祠丙申

前人

萬山頭上寺門開遐想騎鯨汗漫才幽鳥似嫌游客俗白雲疑送謫仙來高文大筆橫千古鮮藻寒泉薦一杯惆悵舊時芳草色年年綠遍讀書臺

題留侯廟壁丁酉

前人

高皇馭羣雄其要在以利龍乃蟲之靈有欲斯可制邈矣張子房卓犖抱奇智功成請封留已釋隆準忌觀其對上言臣乃出天賜固將作之師豈肯遭罵詈傷哉韓與彭未能知此意功人亦復危垂老受囚繫

樓桑邨調先主廟

前人

桑影團團若車蓋天下英雄竟安在三間祠宇故鄉中英魂毅魄應憑賴二十四帝基業傾赤手起與皇天爭虢亭一蹶恨何極西南半壁徒經營陰平馬蹋萬山裂倒捲降旗氣悲咽癡兒願作安樂公枉教賢相嘔心血我行來自錦江頭下馬荒祠拜冕旒雲樹蒼茫五千里惠陵西望不勝愁

歲暮寄懷馬西岡碎林秀才二首

前人

悵望伊人天一方冷風吹滿薊門霜殊鄉暮景增蕭瑟遠道離愁入混茫過肯盡言情最  
厚詩能見性味尤長篋閒夜夜奇光起贈我珍珠字幾行  
小聚春明樂意真偶懷往事感離羣開瓶共試新沽酒聯榻同商未就文什伯輩中偏愛  
我一千里外倍思君東風幾日來鴻雁珍重緘書寄暮雲

淮陰釣臺

戊戌

前人

韓侯持大釣其意甚閒暇滿腹藏甲兵俯出市兒膾項羽如怒龍羣雄困淩駕侯出批其  
鱗漢王楚失霸儻聽蒯生言反手吁可怕區區求假王陽許已陰罵終羅走狗烹竟被野  
雞詐所以嚴子陵不爲光武下高臥富春江風月貴無價何必投釣竿登壇一軍訝

越王臺

己亥

前人

滿身荔雨與榕煙來上高臺思浩然一角河山分漢土千秋日月關蠻天并驅未使居中  
國自帝聊娛欲暮年堪笑降王亦稱長空留遺蹟弔花田

奉檄巡河

前人



上台一檄出通津小隊旗槍擁畫輪民困何由禁攘奪官卑但可任游巡鷹鷂搏擊威雖厲蛟鱷縱橫氣未馴野色波光隨意寫此行差好作詩人

廣州雜詠

庚子

前人

窗外芭蕉綠透紗鷓鴣聲裏夕陽斜鮪魚上市櫻桃熟落盡紅棉一樹花  
愛將青子點茶湯英石玲瓏供座旁斑竹簾深風不起宣鑪閒試海南香  
入秋天氣尙溫和稱體衣衫著雪羅一片西風芳草綠越王臺上紙鳶多  
不必重裘御紫貂不須紅炭獸鑪燒一年半在春光裏十月梅花臘月桃  
佳果駢羅接四時頻婆宜母本稱奇晚秋新會橙剛熟風味何曾亞荔枝  
螺羹魚粥味差勝水族春筵次第登茅鱸禾蟲難下箸北人一例作何曾  
花田種花花作堆朝朝擔販人城來素馨茉莉多情甚遍向美人頭上開  
金籠倒挂夜收香傍午山雞吐綬長五色鸚哥金孔雀累身都是爲文章  
端溪佳硯求難得火捺冰紋辨每譌恰笑石如僞名士滿街真比鱒魚多

珠蘭斜渾壓雙鬟纔過新年女伴闌一色硃紅填漆盒踢青齊上白雲山  
民稠無地闢菑畬水次鱗鱗比屋居若問多人生活計半栽菱芡半撈魚  
青樓夾道瓦鱗鱗螺髻鴉鬟別樣新半捲珠簾曉寒裏倚闌嬌喚賣花人  
萬點紅燈湧夜潮歌喉清脆管絃嬌游人那有思鄉恨無數黃金水上消  
金碧洋樓耀海瞰帆檣羣集若雲屯不因互市通商舶那得諸番入虎門  
崇城岌業鎮南邦背負岡巒面瞰江莫更五層樓上望越王終破漢王降

素馨斜

南漢葬宮人處

前人

香魂玉質總如煙芳草緜緜滿墓田今日花開都一樣就中誰最數嬋娟

厓門感南宋事

前人

白浪茫茫萬里鋪趙家天子一舟孤高宗首作南遷計何念兒孫寸土無

感事

辛丑八首

前人

毒播蠻煙遍海圻刑章深意在防微貪功詎料開邊衅決策誰能振國威險要屯兵仍不

守凶頑附寇竟如歸包容自是從前誤革弊除姦計豈非

烽燧連年照海紅貔貅萬隊擁元戎殺人最痛師無律奪地徒聞賊有功民屋頽殘千炬  
火夷船來往一帆風珠江多少繁華夢回首同歸浩劫中

爲鴛爲鸞費安排甘委生靈作劫灰防海金臺非我據橫江鐵鎖是誰開狂瀾未挽戎興  
禍滋蔓難除將乏才至竟荷蘭恭順否捷書虛報事堪哀

褒詔頻聞被寵榮可憐哀樂不同情黔垣赭瓦逃民屋舞女歌兒大將營報國那甘糜頂  
踵全軀祇解蔽聰明廬山壑問填盈未便爾倉皇議罷兵

貂蟬幾輩幸承恩罰罪酬庸更莫論攘劫不聞軍令小需求務給闔威尊斧斨破缺歌狼  
跋蕙苴充盈誤馬<sup>危</sup>援欲辨忠魂何處認漫天市地陣雲昏

欲倒銀河塞漏卮五羊城上插旌旗更難爲繼民財竭縱得粗安國體虧元氣彫傷宜急  
復惡氛繚繞尙堪疑議和自古非長策誰勗精誠達主知

幸得閭閻起壯夫爲王敵愾効前驅呼聲動地重圍合衆志成城逆勢孤小隊自能聯臂

指巨曾旋見授頭顱問它壁上閱觀者手幄軍符自愧無

扶危救困見良謀城下爲盟自古羞鴻雁于飛思集定豺狼無厭肆貪求論功誰入名臣傳懷遠難消旅客愁終仗聖明天子福干戈從此遂能休

春寒乙巳

人前

二月春猶淺寒威作意侵日無消雪力風有妬花心鑪篆依人靜簾波接地深韶光如此過孤負好園林

殘燭

前人

殘燭亭亭畫几邊有人相對不成眠可憐淚熱還難歇應悔膏多反自煎矮屋風霜將盡夜歌場絃管欲明天兩般滋味都嘗過往事回頭已化煙

題王雲鵬

福綸

學士桐陰課子圖

前人

黃金有價書無香人海滾滾紅塵忙先生掉頭笑不顧獨與古人樂相晤膝前玉立雙瓊枝手把遺編課朝暮老鳳長鳴雛鳳隨桐陰颯颯生涼颺滿堂淨綠不可掃清氣徹骨寒

鬚眉八年官階久不進

一作吁嗟乎先  
生八年官不進

秋色蕭蕭生兩鬢長安冠蓋如雲屯閉門奇字無人問

兩郎卓犖俱英才勢龍欲動跳春雷有子如此亦足快富貴於我如飛埃我披此圖三歎  
息能讀書人豈易得願挾經術還唐虞莫僅傳家須報國

細想

前人

深嘗世味足悲辛他事休言且飲醇天地之間如逆旅羲皇以上又何人著書妄作名山  
想到岸方憐宦海身細想古今誰不朽除虛空外即沙塵

贈外弟陳鶴溪

玉章

前人

陳子陳子人中奇皎如玉樹臨風枝神清骨秀廊廟姿雙瞳翦水明玻璃學如不足日孳  
孳嗜古人書無倦時如飮酥酪如含飴以錐畫沙印印泥杼所蘊蓄爲文辭哇鼇擲鯨咆  
熊羆瓊冠玉佩生光輝尤於輿地精討釐披根搽罅無留遺收卷宇宙縮坤維方者爲矩  
圓者規如指其掌視諸斯子不自才氣逾卑懇懇請益相追隨若芥吸珀針引磁愚也千  
百無一知豈敢抗顏爲子師子來我喜子去悲愛而不見如渴飢臨歧握手相嗚呼贈子

語言其慎持業精於勤荒於嬉積銖累寸無惰疲堂斯肯構垣崇基矧子年盛才有爲成  
此宅相終可期精力彌滿豐羽儀神鷹在空馬不羈一去萬里誰攀追

入千山

前人

千山如奇文筆勢無一平山山突兀而崢嶸蓮花亂插雲頭青夙疑茲山虛得名入山始  
覺移我情賞心獨愜不辭遠手持玉杖空中行一雙白鶴作前導兩耳但聞松風聲丹巖  
碧壑杳然際中有溪水相迴縈鳥唳猿嘯谷窸窣千樹萬樹梨花明不知來路在何處下  
視天氣青冥冥仙人家住碧虛裏雲樓鳳閣開瓏玲望見我來各歡喜拍手大笑齊相迎  
聳身一躍八千丈劃然長嘯天耳驚脚蹴造化小兒頂指點日月如流螢煙情霞意兩相  
盪使我百竅俱空靈世間軒冕是何物較之蟬蛻誰爲輕竟思散髮自茲往遍躡仙雲馴  
茯苓

龍泉寺

前人

亂峯深處寺門開滿地松花滿徑苔一片泉聲如雨落半空山勢作潮來石含仙氣當賓

閣雲抱禪心傍講臺我亦忘機塵外客谷猿林鳥莫相猜

偕馬西岡重游無量觀遂登三十三天望聚仙臺振衣岡諸峯

前人

山不厭重遊刻意肆搽抉昨訪無量觀倉卒遽相別譬如讀異書名理少昭揭又如察臟腑未能見癥結恂恍一夜中魂夢難拋撇晨興理籐杖急如赴飢渴馬子稱遨頭腰脚鑄生鐵引臂相提攜屢笑跛牂蹶積葉一尺深微徑挂林末松根躡作梯半上已百折重足偻側行險被石鋒別鼓勇造其巔中路幾疲竭天可階而升自疑有仙骨登高覽八荒獨立天地闊北望聚仙臺形勢尤帆幟振衣岡在西鼎峙相頡頏聞有綠髮翁住此鍊真訣我將往從之一顧心膽裂懸厓鑿微渦迹同鼠齒齧不堪作深想失足儻一跌余友木彊人欲赴竟中輟矧余弱於君豈不念存活不見韓退之作書與家訣拚命換山看毋乃太癡絕

詠龍泉寺諸景

前人

萬松亭

紅亭半角露巖隈，風牖玲瓏四面開。  
幽境幾人解欣賞，白雲終日與徘徊。  
試安茶竈燒黃葉，閒賭碁枰坐綠苔。  
明月滿山清梵歇，一雙白鶴自空來。

瓊島虛舟

山風浩蕩起中宵，小閣凌空欲動搖。  
一枕松聲瀉清夢，恰疑孤艇泊寒潮。

西閣客鐘

一杵寒鐘暮靄冥，銀釭初上亮於星。  
小窗我已鈔詩罷，讓與山僧寫梵經。

瓶石

瘳骨嶙峋玉有棱，一拳寒翠撲虛樞。  
擬傾雲液三千斛，醉臥煙霞不願醒。

抱石松歌

千山拔地吸靈脈，半化爲松半爲石。  
無量觀後抱石松，直疑洩盡山精魄。  
厥石高踞巖之巔，兀若巨靈撐老拳。  
寸土不著苔滑澆，凡木欲託愁無緣。  
一松倔彊抱奇骨，獨與茲石同周旋。  
屈身半入幽澗底，蒼皮斑駁枝連蜷。  
儻使放縱爲直幹，其高當與山齊肩。  
似愁孤立



少依傍，偃僂俯就，相愛憐。我初疑是米老精魂，所託化免，令俗子驚狂顛。又疑驪龍護珠，懼探取，深山酣睡，一十二萬年蒼蒼者。石氣齊化，松上之雲煙落落者。松聲俯答石下之風泉，石得松而益秀，松與石兮同堅。一堆空翠，不可掃，霽暉晴靄交澄鮮。可惜無人解欣賞，終古沈沒荒厓邊。吁嗟松兮爾，其自珍重一枝，便可爲梁棟。知音獨有石丈人相對空山，誰伯仲。安得夸娥更逞擎雲手，攜取此松。此石隨我走移，置齋前作翠屏，讓與荒園三十畝。手招白鶴天上來，明月清風兩無負。朝夕坐臥當其間，呼石爲兄松作叟。

游香巖寺

前人

雪庵棲息處，乘興共登臨。雲窟遺仙蛻，風鈴語佛心。寒松一萬樹，山合翠屏深。欲去碧煙暮，虛空起梵音。

冷洞

石瀨潺湲山徑長，薜蘿流翠滴衣裳。道人手把青鸞尾，閒掃松花作宿糧。

普庵觀

絕頂極峯堯孤雲若可招拔空一峯起拜下萬山朝淨地塵難著長年雪不消何當騎白鹿終老伴巖樵

遊大安寺

前人

入千山十日矣覽諸勝畧畢最後偕同人游大安寺奇峯疊起怵目駭心較他處尤勝頗喜遊興之不索也作是詩

幽討已浹旬名勝俱領畧目饜心益貪賈餘氣騰躍大安古禪刹云在山南角興深無遠途快鶻健行躡幽谷天微茫鴻荒疑未鑿松子亂打頭風急落如雹虎過糞尙新腥氣滿林壑疑駭生退念欲悔此來錯數峯忽飛來齊向眼前落奇鶻伸九首巨鵬掉一喝刻削生圭稜廉厲砥鋒鏑並峙勢欲爭孤拔意無怍天縱使之驕恣肆裂規矐欲笑欲咨嗟忽喜忽驚愕神關不自扃五內被探攫擲入空虛中與之共騰蹕初意疑此山前勁儻後弱無窮出新奇荒怪非臆度造化雖甚富何以當剗削稍進覩精廬牆宇炳丹牖衲子開禪關召客息煙屨憑闌以一眺積氣青漠漠羣峯四來朝環拱齊受約蒼茫雲海中身坐碧

蓮萼豪快那可言一洗俗懷惡共恨不早來未得先此樂吾意殊不然善游如善學歷境  
日不同總須今勝昨食蔗先其根至梢味已薄好事勿迫求餘興不終索此理問衆山一  
呼已百諾

題大安寺壁

前人

梵宮高聳接蒼冥俯視諸方等建瓴曲逕深穿巖洞黑奇峯對夾寺門青松杉絕壁巢雙  
鶴風雨虛堂會百靈聞道至尊曾駐蹕山雲還作虎龍形

留別千山

前人

欲去仍留悵望頻梨花滿地送歸人名山小住真清福勝地全游亦夙因盡掃煙霞歸筆  
墨竟拋泉石就風塵終當卜築三間屋蘿壁松窗著此身

劉烈女墓

在城西門外  
事詳通志

前人

下馬讀殘碑未終氣填臆英英劉烈女植節何挺特微軀寧可捐大義不可賊遂將一寸  
心化作萬鈞力白日照地中泉路幾曾黑君看墓前花凜凜有寒色

詠淡巴菘二十韻

前人

不道相思草情苗若許長分來殊域種傳徧美人香衆口有同嗜流風殊未央禁章聞勝  
國炎運兆興王春雨澆逾綠秋陽暴漸黃花新疑積粉葉嫩說余糖氣協氤氳使功留瘴  
癘鄉細裁斑竹管巧遇紫荷囊襟袖懷攜便雲煙吐納忙溫馨欺荳蔻醉意勝檳榔噓吸  
通靈竅薰蒸抱熱腸呼僮教代熬奉客勸先嘗酒後頻思憶茶邊細品量胃脾留積癖齒  
頰戀餘芳清閣姬姜伴詞人翰墨場冷懷憑慰藉閒趣助徜徉火食寰區徧灰沈小劫涼  
用多齊菽粟性煖破冰霜似得餐霞術難充辟穀方中原無曠土莫使礙農桑

將軍出塞打圍歌

前人

寒氣肅穆天地清朔方健兒慣打牲力窮飛走不得遁發縱指示如用兵國家歲時有定  
制詔遣將軍控邊騎豈惟備物多取材順時講武存深意雪花亂落風怒號元戎大纛中  
軍高萬帳如星撒平地齊禱神木椎牲牢抄山令下氣如虎三軍不譁靖旗鼓遴選精銳  
操火攻乘以長弓與勁弩駭禽狂獸紛凌兢神燧人立鷹電騰呼聲四動裂厓谷毛血飄

灑風雨腥前軍猛士善擒殺雙眼綠睛首紅髮橫拖一虎肩兩狼跪謁轅門請功伐是時  
日暮沙氣昏大官行炙傾金尊高燒紅燭巨如臂冰雪不凍穹廬温平明歸馬捲旗纛毛  
羽斑斕彙羣族大車百兩聲隆隆回首平原莽肅肅嗚呼宇內曾未康海氛不靖勞軍防  
安能殲賊如殲獸威弧遠控摧天狼

馬西池聞余將遠行攜酒過訪即疊往年聯句韻奉贈

前人

訪我攜壺壘翻勞作主人重添今夕話各看昔年身拙宦慚仍守高才惜未伸一琴歸故  
里雙劍合延津別久容顏改交深臭味親到門剛落日入座便生春有子君堪老多書我  
不貧家風同淡泊官况代酸辛善謔趣彌雋狂歌氣倍真酒尊憑跌宕詩筆極嶙峋促膝  
歡方洽回頭迹又陳幽人自邱壑賤子便風塵石裏終藏玉鉛中那鍊銀夢聯寒榻短愁  
入暗燈新雅旣蒙投縞離懷欲染巾憂多心氣損老近面皮皺濶落思前事綢繆說後因  
鳶肩誰識馬牛尾共嘲麟尙戢重羅翼應蘇涸轍鱗雲龍會相逐休更兩傷神

團練謠

丁未

前人

驚風颯颯塵塞途有飛者烏走者狐擾我廬居奪我食千人萬人齊叫呼嗟連歲苦災  
歉盜如毛起官不誅卻令百姓自團練鋤犁半化爲戈弧事成果可保家室此舉豈必非  
良圖胥吏猙獰急催迫賊猶未去田已蕪何況徵求到雞狗美酒大肉肥其軀餓妻瘦子  
色憔悴蔽體那有完衣襦噫吁嘻賣刀買犢果何術古之循吏今豈無

重遊千山暮至龍泉寺

前人

丹梯翠棧路重經颯颯西風萬葉零游客忽驚同伴改好山仍似舊時青巢爭古木鴉將  
宿鞭響殘陽馬不停我識寺僧僧識我相逢一笑在禪扃

登三十三天放歌

前人

高峯插天無與抗我來高出此峯上秋光如水洗眼明六合空虛徹塵障夕陽斜挂手可  
捫羣山勢若連濤奔蒼松紅葉互淩亂白雲一氣相吐吞中有浮屠古宮室樓閣參差沒  
還出微茫白堦列東西卓立如椽兩枝筆天清地曠懷抱開長風萬里西南來披襟當之  
何快哉笙鶴依稀若可接所媿俗骨非仙才天兮天兮何不化我爲此山之松石俾與山

牛野鹿同游息不墮世塵遭屈阨不然化我爲此山之雲煙空中游戲誰絆牽獨往獨來  
千萬年胡爲乎靈我以神明而又膠我以骸幹更復飢寒驅迫之僕僕風塵黑顏面一邱  
一壑守亦難蘿薜生愁猿鶴歎山靈山靈莫我嗔我本東西南北無定身有山如此不得  
住媿彼雲間肥遁人

西崦

前人

閒步蹋黃葉履聲空谷聞人家不知處一犬吠寒雲

尋龍泉寺後山

前人

午後雲開秋雨過瘦筇輕屐上嵯峨荒厓路僻人蹤少老樹年深魅氣多緩逐山童蹋霜  
葉時驚野鼠竄煙蘿黃精手掘十斤重白髮相欺奈我何

遊大安寺暮歸龍泉

前人

大安昔游處重歷覺情親寺犬識人熟山僧說虎仁蒼巖歸路晚紅樹夕陽新下馬殘鐘  
後寒雲帶滿身

登羅漢洞絕頂

前人

一峯雲際插我到與雲齊龍虎監仙洞星辰挂客藜接天平野盡撲地亂山低回首呼黃鶴長風來自西

答人問龍泉寺

前人

君問龍泉景何似與君纔說興飛騰雲煙皺皺山千疊亭樹高低樹幾層僧引北厓石罅水客談西閣夜窗鐙關心一種幽奇處多恐倪迂畫未能

王曉坪樹滋太史過訪別後柬寄

前人

好風吹滿敞廬春翦燭圍鑪笑語親兩世有情垂顧意十年無恙別來身喜談風雅真名士解諒疏狂祇故人草草蓬門留一宿送君猶望去車塵

過古寺見曾石塘題名作詩弔之戊申

前人

永安門外古梵宮歲深風雨彫青紅何人題名辨碎碣令我忽悲裏愍公維公獄獄挺英節抗疏圖邊何勇決鯨鯢未翦青蠅飛將臣頭寄相臣舌當時套寇東西跳諸將縮頸甘



遁逃百鳥之中見一鶚下視狐兔毛羽高人謂公喜功我謂公忠國志在靖邊非開邊不入虎穴子安得嵩鸞之肉豈足食可惜尙書並誅殛鐘鼎勳名刀鋸酬涕淚橫流灑冑臆君不見宋岳武穆稱精忠徒思痛飲趨黃龍又不見漢趙充國主邊議君臣一心成大功英雄遭際各有命人之所異天難同寺中老僧笑搖手云君所云我云否吉凶悔吝生動中一動危機無不有君看鈍默能久全誰似滿堂羣土偶姑妄言之姑聽之寒風日暮吹靈旗我欲酹公奠清醕英魂化鶴來何時

有嗤予爲詩者作此答之

亦知才有用何苦費謳吟無分當時事難爲終日心性情聊自悅風月偶相尋若比營營者膏肓猶未深

借趙亦山

文瀛戴弼三廣謨兩明府游城南焦園三十二韻己酉

別業傳焦氏亭臺結構佳初聞神即往擬訪願頻乖昨夜停殘雨長空掃積霾正堪乘霽景兼可散羈懷俗事全無累幽人恰有儕倚樓清興並安道賞心諧候煖剛來雁途遙詎

策駟輕衫兼緩帶矮帽並寬鞋瑞靄瞻仙闕芳塵蹋御街回頭城已隔迎面樹齊排野色  
濃於染山容淨似揩歌聲彼此和行影後先偕邨路逢僧引園門候客闌入深斜度逕撥  
密曲循階登眺棲霞閣盤桓貯月齋天低寒綠壓地淨落紅埋暗脈泉疏禹奇形石鍊媧  
老藤蟠肖虺枯木瘦疑豺泥破笋抽箭風生松墮釵茶糜兩架合薜荔一牆皆草色侵虛  
幌花名誌小脾躍鱗機潑潑鳴羽韻啣麗彩迷雙眼空香透百骸共欣春似海祇少酒  
如淮小住時難待將還意尙挨暝煙昏亂竹夕月淡孤槐迤邐尋歸路崎嶇歷斷厓林光  
猶顧望市語忽喧哇守舍憐羈旅應官類戲俳志雖邱壑戀身奈利名差放曠纔雲鶴拘  
墟又井蛙故園徒自好惆悵隔天涯

過易水懷古

庚戌

前人

士無尺寸柄有爲在一死淋漓滿腔血但願獻知己燕丹躁狹人劫秦雪仇恥所事竟何  
成適速國亡耳先生勿泄言其見己甚鄙請遣秦舞陽所信更如此光前死軻後死借頭  
將軍中又死三人之死良亦難可惜死一燕太子

望諸君

果然駿骨不虛求七十連城一霎收  
嗣主尙疑奔趙意終身不設伐燕謀  
比才心已傾諸葛作論文無媿夏侯  
自古明良難會合黃金臺廢使人愁

過銅雀臺故址弔魏武帝

當年此地湧樓臺萬戶千門向鄴開  
西望遙驚一龍起東風不送二喬來  
捉刀人有英雄氣創局天生篡竊才  
老去卻爲兒女態分香賣履不勝哀

詠古

五代梁唐晉都洛陽漢周北宋都  
汴明周王亦在汴皆今河南省地長  
夏無事偶吟數章題作詠古云

黃腰遺孽起風波凍雀悲鳴困網羅  
報主但聞孫供奉生兒空羨李沙陀  
憐卿特授傳家璽殺賊誰操入室  
戈三百餘年唐社稷假君毒手奈天  
何

皇帝稱孫事更哀中原瀕洞極塵埃  
矢難盡用留戎患劍縱橫磨少將  
才擾攘更無龍種

出飛騰竟有雀兒來慶陵一閉真人起纔得先生笑口開  
回兵孤寡坐成擒學著黃袍計更深開國君臣能略分傳家兄弟不同心諛辭誕語誣天  
降怪石奇花刮地尋爭怪寒塵來滾滾燕雲一例付消沈  
徧地煙塵戰血紅波臣爲虐更洶洶殘兵疲餓城難守癡虜貪迷庫尙封亂世天心資盜  
賊中原人肉飽魚龍蟲沙何處尋荒劫愁聽西風相國鐘

謁太昊陵

一杯高峙柳湖旁下馬荒祠拜夕陽抉破天心傳百聖拓開世局掩三皇龜龍蟠伏園陵  
古風露清靈草木香卦畫寥寥纔數筆後人何處想文章

解組後馬西岡適至喜贈

辛亥

前人

正因謫宦感離羣天外飛來一朵雲握手各悲年半老談心直到夜中分倔彊自笑仍爲  
我患難相依恰有君莫更樽前談世事不曾多飲便成醺

雜述

天生一代人人了一代事其中出英賢獨懷抱與志抱玉以自刑茫茫卞和淚魯叟歎猗  
蘭有德而無位窮則善其身斯言庶當佩威鳳覽德輝所以人稱瑞

邈矣陶淵明高風不可抗偶然思絃歌其言何坦曠豈無經世懷卷之不得放翩然歸去  
來田園恣跌宕非惟不愛官辭官心亦忘飢寒常晏如道全神自王回也其庶乎先生豈  
多讓

鶴不入雞羣龍不處蛙族悠悠行路間幾人差免俗豈不喜交游交游多反覆亦有素心  
人晨星太孤獨更惜幽蘭花含芳老空谷三復谷風詩淒淒不能讀

庭樹生芳花一花歲一度未必舊花魂更向新花附榮謝有循環自是陰陽數惟人則亦  
然於此可深悟未生從何來已死又焉去死後與生前想當無二故釋氏談輪迴風影難  
追捕

今日苟不樂來日復如何造化相愚弄心志空蹉跎我有一尊酒可以養天和持酌素心  
人晨夕相與過後遇且聽之所得今已多

我生鮮嗜好時復爲詩篇身處一室內心游八極間持此媚世歟時人固不好謂可傳將來虛名更難料惟蜂則有蜜惟蠶則有絲問其所以然彼亦不自知

有客有客歌贈馬西岡

有客有客頽而長雙瞳爛爛巖電光快如天馬脫羈纏冀北之野斯其良少年折節勤繚緗目掃萬卷仇秦皇真氣吐作奇文章稜稜滿紙生風霜此才謂宜貢玉堂長安三上穿屨芒翩然歸臥雲水鄉老蠹甘作書中僵平生眼底無羣儉獨許賤子參翱翔太歲甲辰日在房我遠歸自南越邦騎馬訪君山西岡欣然一笑操見龐蔬酒列几鐙照廊擘戰頓盡三百觴主人既醉客更狂仰天大叫星辰忙三載追逐雲水旁長歌短調敲琳琅筆鋒禿盡氣不降同時數子誰雁行健者赫劉陳李姜哀哉俗學紛蝸蟻吾軍旗鼓疑可張賤子不肖貪軒裳一別遂如參與商騎驢京國趨踉蹌腰扇障面塵土黃所失者百一不償小邑偶蝨淮之陽期補漏<sup>危</sup>爲國防鑪工驚怪呼不祥鉛刀是寶摧干將賓客駭散如亡羊適值夫子來游梁怒皆欲裂氣搯吭謂爾茹蕪我共嘗勉進藥石扶羸筵要使頑鈍生

鋒鏃而今時勢那可量雙尾之鷗九首鷓中無所作氣自彊安能縮頸如龜藏會須與子  
騎鸞鳳東觀日出凌扶桑掬取海水淘肺腸薜蘿爲衣芝作糧浩歌一曲天茫茫

閱青門弟自娛集題贈兼示舊時同社諸友

癸丑

劉文麟

青門落筆快於馬早歲便解耽騷雅韻清疑奏越石筋氣壯欲振武安瓦偶然興到風火  
生十手不及供鈔寫飢來一字不可餐俗兒大笑鬢頰哆昨聞我歸手一編謂兄差是知  
音者我從別君四五年裨謔謀邑未謀野滿懷塵俗詩可知對此目瞠面深赭追思丙午  
丁未間朋好聯吟結詩社鉤心鬪角競出奇餘興淋漓倒杯罌一時勝會那可常存歿關  
心淚瀟灑健亭才高惜不壽墓木而今已堪把李姜奔走求一衿赤日曬頭泥沒踝陳子  
家難尤可哀哭望南雲歡思寡西岡無恙但病貧久歇吟聲類羊啞惟君與我如秋蛩露  
思風情尙縈惹吁嗟天地何時清戰血橫流人作鮓奇書祇合讀孫吳迂策何煩陳董賈  
用非所學久自知玉肯求沽金躍冶入山期與數子偕深結茅茨寄楸檟

哭江安觀察陳問山

克薄

先生

是年二月

殉難金陵

前人

星隕臺城劫血涼大江東去恨茫茫孤臣豈復爲家計弱子兼能作國殤天鑒丹心三戰  
盡地埋白骨四堆香公亡自是無遺恨爭奈旁人慟感長  
都門前歲拜旌旗正是微官被謫時頗惜我歸成墮屨豈知公去竟騎箕  
感馬革難還事更悲擬請褒忠勵臣節上書無路淚空垂

臘前三夜與陳鶴溪家青門弟西齋聯韻

還山臥白雲幸爲世網宥官罷家且貧衡門寡客就陳子孤峭人獨愛蓬室陋青門所素  
歡覲面各驚瘵仙維時冬序殘雞乳野雉雒鶴頑雲凍不開北風號旦晝青破屋聲動搖  
嚴冷閉膚腠仙夕窗影三人挂牆燈如豆僧磬定古庵戍柝起荒堦鶴此時無歡伯焉解  
兩眉皺相逢且痛飲形隔氣交透仙良會非偶然疑有神鬼佑鶴丙午丁未間追思景如  
靚仙時平人亦閒雅集齊輻輳語元機默參韻險詩悍鬪青立監觴政宣角勝碁仇構鶴  
睡遲妻妾嗔侍久僮僕呪仙觀今自然犀攬古手探穀青窮辯舌根僵狂笑咽孔嗽鶴奇  
氣干虹霓雄心隘宇宙娛樂能幾何人事頓乖謬嘻余走一官修容入馬廐拳石弗自量



疆欲補天漏猛噬碎不防公怒狗陰噬不止將取中險哉矢夾脰歸來無一錢里黨競嘲  
詬餓死士之常內省終無疚仙予昔從君游請益鐘屢叩別後掇一衿贅累等懸瘤芒屨  
兩游燕蚩氓抱布貿奇貨諒可居賈非時不售君今大梁歸蟬蛻委冠綬遺我金石言沈  
疴得鍼炙鶴兩君且勿喧我歌一懷舊頻年走東西蹤迹雲出岫辛苦耕石田苟死全老  
幼假館南山南垂頭困檻獸躑躅錢虜旁自覺泔銅臭焉忍與終古決去箭脫殼索逋人  
踵門婦謫起中葦竟擬火詩書寒餓字不救青投筆今其時戎馬正騰蹂蚩尤妖霧興白  
日景昏雲連營互長山兵壓江左右死人如亂麻天地一棺柩仙尸氣吹作風血腥不可  
艱犁耨把無人千里廢耕耨軫痛皇曰嗟任重將不副環城無寸功莽玉賞徒懋師老財  
力殫蟻蝨生甲冑鶴百道飛芻糧輸輓敝輪輮倒海塞漏卮爭滿無底竇廷詔頻下頒捐  
貲勸鄉富翻濟官吏貪梁鵠濡其味哀哉此良民窮迫半爲寇矯首瞻南天淚下瀉懸溜  
青殉難數君子生稟嶽河秀飲刃甘如飴身死名益壽他官甯非人爵高祿且厚乞活拜  
草間穀鯨同老畜或棄垣與池投險鋌而走更怪之數公知者抑不奏以致俗聽疑衆口

齊誼譎竟思磨山厓大書復深鏤紀事著其名蛟螭蟠篆籀善善心之良諒非法所誅仙  
 我生嗟不辰骨肉遭顛覆伯父官金陵理漕膺雁繡楚氛蔽江來直下勢何驟遇戰捐厥  
 軀全家罹鋒鏃馬革何由還天上騎箕宿異兆報鵬音凶辭現龜絲僕來語倉皇驚聞起  
 更仆承禔哭招魂悲風慘堂窗目斷江雲黃吞聲淚奔湊忠節壅不聞大官充耳褒拍  
 案長太息天人理莫究我輩生今時窮魚落井瓮青四顧寰宇間忸忸中悶瞽仙安得謝  
 羈鞅鶴厓厓向僧儻憇倦盹藜牀青飯飢捧土壙掠蜜拚割蜂仙攫果跳逐狄絮衣擘雲  
 裝鶴礪齒銜石漱名唾時彥爭青道拽老仙授談天口橫衝仙觀世手旁袖斯願那易酬  
 且鶴共酣臘耐青僂停立小盆梅花笑相侑仙一雪景更佳千金不能購今宵醉莫辭幾  
 時重辭青迓青

元旦後三日閱陳鶴溪舊歲寄詩感和甲寅

劉文麟

四十年華瞥眼過耽詩卻久廢吟哦靜聽比卷歡聲少兀坐空廬睡意多豈料我心頑至  
 此不知斯世確如何故人句裏無窮淚悵觸中懷一放歌

火燎風原勢莫收  
天星上動五諸侯  
支分寇已窺畿輔  
株守軍猶次石頭  
大造戲含芻狗  
意迂生妄抱杞人  
憂徒聞聖主勞宵  
旰帷幄誰能運一  
籌

也知時勢費躊躇  
儻用仁賢國未虛  
四海心齊尊主勢  
萬年基久奠皇居  
哀鴻但使能安  
集封豕何虞不  
翦除專意富彊人  
徧是請看成效竟  
焉如

居危况復不思危  
自飽無妨任衆飢  
囊笥意諧官判牘  
桁楊威迫盜張旗  
竟依卿法爲長  
策直覺斯文是贅  
辭獨有勞人迂且  
拙朝晞暮暗鬢成  
絲

羣公團練費經營  
捏土搏沙彊合成  
士氣縱能卑後振  
人心終不亂前平  
但思遁世容逃  
劫豈肯逢時更  
瞰名太息東山謝  
安石念灰康濟媿  
蒼生  
無端悽切感離羣  
雪壓寒廬黯黯雲  
才子性情能好我  
亂時遭際更悲君  
夢隨煙散詩重  
補愁逐春來酒易  
醺何日西窗重翦  
燭冷吟閒醉共殷  
勤

陳鶴溪邀余讀書千山因贈

乙卯

劉文麟

白雲一別幾經春  
此日因君得更親  
錢虜那知塵世俗  
書癡終覺性情真  
去尋山水之闕

樂同作羲皇以上人祇媿江淹才已盡相傳敢詡筆如神

重入龍泉寺

前人

春風吹客到舊夢滿珠林幽谷昔空別白雲今更深靜觀流水意閒坐老松陰不比參禪  
叟無心卻有心

游圓通觀

前人

春色萬山同探春興不窮鳥嘯風翠裏花落水聲中倚杖雲邊石開襟松下風道人羅茗  
具清話竹房空

游大安寺

前人

灌木連雲不見天藤蘿翳翳響流泉思登初地難停脚笑挽洪崖共拍肩波浪萬層山學  
海煙霞一氣客游仙此來可許騎黃鶴誤落塵埃已八年

龍泉東庵

前人

蒼蒼山四圍拄杖立崔巍林靜鳥聲樂巖幽人迹稀倒懸松不死斜竦石將飛欲結茅庵

住蕭寥遠世機

重九日偕陳鶴溪王雪樵飲酒南山放歌

前人

山靈酌爾一杯酒此樂生平未曾有誤縛塵纓二十年今日千山作重九千山秀出東海  
旁與天相接青茫茫遼陽百境不挂眼此中邱壑真吾鄉我抱瑤琴入山住山月照人圓  
幾度風吹紫芝日夜生靈苗入眼紛無數昨逢羽客向我談菊花黃滿南泉庵徑扶藜杖  
出門去開口大笑人兩三楓葉初霜點山綠萬斛流泉清歎玉風爲馬兮雲爲車前導赤  
虬後蒼鹿飛上萬丈青蓮臺斜陽照耀天地開雲煙草木盡秋色蒼然一片從西來黃頭  
奴子解人意淨掃雲根半弓地苔花繡作茵錦紋謾謾松風奏仙吹羣山露頂手可探羅  
列尊前如大哉興酣欲折扶桑枝挂住西飛六龍轡且逐烟霞浩浩懷那知塵土悠悠事  
鶴溪子雪樵生骨格樸野神氣清愛爾從游無俗情勿輕今日一杯酒此酒明年何處  
傾

懷陳鶴溪

前人

冰滿遼河雪滿山  
陳生走馬向長安  
頭銜共羨傳家好  
心事誰知蔭子寒  
地望金陵增涕淚  
天開玉闕會衣冠  
得膺優典尋常事  
史冊榮留後代看

瀋陽書院有王生雪樵

乃新者遇窮而工詩以佳什見貽依韻答之

接談滿座起清風  
再讀新詩趣亦同  
爭怪逢人偏說項  
未妨儘客互嘲雄  
汝南自信賞非謬  
冀北忽驚羣已空  
誰解拈花微笑兩  
心相喻不言中  
蕭散襟懷見士風  
敝衣糲糲志誰同  
老如遇世榮非晚  
貧不干人伏亦雄  
業有專門須更勉  
家徒四壁莫嫌空  
請看朝市營營者  
清夜何能問此中

感成

前人

驚看星動五諸侯  
莽莽煙沙戰骨愁  
早慮南邦無淨土  
那知西海復橫流  
漏卮枉用民膏塞  
全局終思國手收  
二百餘年佳氣在  
幾番回首望神州  
翠華杳杳竟臨邊  
五百旌旗拂野烟  
何地足爲安樂土  
有人大似廣明年  
海氛急掃孤衷切  
天步重迴萬頸延  
聖祖神宗疆域在  
是誰陳策議東遷

肉食何能蓄遠謀幾教撞破五雲樓祇期士有揮戈志翻覺嫠無恤緯愁鴉陣自還宮樹  
晚馬羣齊踏塞雲秋諸公已進回鑾表更爲平戎試一籌

傷亂

前人

敢幸先幾賦遂初雄都巨邑半邱墟不堪萬事付長歎更是一身無定居利是孰收持鷓  
蚌名猶競竊溷龍猪豈真要剗生靈盡搔首茫茫仰太虛

獨詠

截兕剗蛟古太阿昔年銳氣是如何九州莽莽蹤將徧萬事悠悠鬢漸皤世上榮華分我  
少性中羞惡比人多已知造物差排意獨立蒼茫發浩歌

讀史

國破家亡事有端休言治亂本循環驅民作賊官威赫奉吏爲師士氣孱美俗不還三代  
上高賢多老一廛間是誰享盡容容福掩卷尋思淚欲潸

與陳鶴溪書院夜話追憶千山舊游聯句五十韻

劉文麟

快作平原飲何期遇素交仙清言饒異指厚誼甚同胞鶴事往懷仍繫詩來字共敲仙衣

冠醒蟻夢風雨賦雞膠鶴氈敝年光促燈昏夜色淆仙迥煙團老屋松霧冒荒郊鶴鑪爲

驅寒擁杯難話舊拋仙興豪鯨一吸饌美兔雙魚鶴雅集聯新什幽棲憶故巢仙避囂尋

鹿侶筮遯悟羲爻鶴鑿廣廬深構盤空徑細鈔仙澗聲千派合山勢萬重包鶴觸席雲生

座連筒水注庖仙塔尖出樹杪碑影臥階坳鶴洞闕陰蟠虺潭浮黝鎖蛟仙木奇疣礮礪

石醜面類貳鶴望海胷吞芥攀星手摘匏仙躡危瞰熊館拯困解塵茅鶴藥竈猿晨守松

扉虎夜抓仙佛龕挂蝙蝠梵篋絡蠨蛸鶴跌榻禪心槁窺窗怪眼顛仙勁松蒼散鬣纖草

綠垂鬢鶴露圃豈生莢霜園栗折苞仙蘿牽綠壁蔓竹探入檐梢鶴客屐花閒引儒冠鳥

競嘲仙古苔疑篆籀靈朮當蔬肴鶴淪茗泉嘗冽澆蘭土沃燒仙穴糧搽鼠獲厓蜜犯蜂

攔鶴杖每呼龍奉書多附鶴梢仙訂文資友益說法被僧勦鶴丹訣要仙授黃精課僕措

仙逸情娛俯仰醉語恣喧呶鶴覽古睛祛翳談今耳息矍仙玄關參道錄素位惕刑禬鶴

未遂孤蹤隱翻遭衆口警仙腰憐元亮硬顏媿子都姣鶴我敢才論斗渠原量比筭仙酬



庸名器濫積蠹簿書鶴漏大天難補根虛地尙培仙江湖叢戰壘畿甸走征轡鶴國勢

資三輔戎氛逼二嶠仙梯航博氈罽飛輓困芻茭鶴跋浪鯨橫掣揚塵豕怒咆仙壯懷思

請劍凱奏盼歌鏡鶴且恤周嫠緯安施郢匠鉋仙馬誰知赤汗鷹自惜青骹鶴有樂尋中

聖無心覲上佞仙感深辭激楚吟苦韻森箝鶴悲喜皆陳迹榮衰幾幻泡仙名山勞悵望

何日更誅茅鶴

和馬生松花石硯歌用昌黎石鼓歌韻

前人

馬生善詩賦石硯詩成索我賡其歌我辭淺陋乏文藻貽笑石硯吁如何興朝龍躍起長

白文明運啓韜弧戈江神効靈貢石硯沙鏤浪齧堅不磨騷人墨客嗜成癖懸金購買爭

搜羅是誰剗取白山髓一拳氣已吞岷峨島夷探索冒百險腰繩手炬窮陰阿肆賈居奇

等球璧向人誇詫頻嘘呵又云石乃古松化試述其語姑傳譌松生不知幾億載苔篆徧

體文蟠蚪孤根下插江底裂中有窟穴宮蛟鼉年深往往現光怪雷斧怒斫青銅柯化石

非石木非木綠錦截下天孫校湘簾斐几小齋靜攜歸撫弄情委蛇更欣山客贈碑揭妙

蹟正好臨曹娥曲池注水絕清泚澌澌有類江中沱叩彈隱隱發聲韻冷然泗磬清且和  
我聞宋時采端硯役使千指官程科琳腴剖盡下巖閉紛紛膺璞今空多漢甄魏瓦亦蕪  
沒久矣榛棘悲銅駝豈若茲硯足珍惜連城璧價無能過讀書萬卷破奧窔願與石友同  
切磋但嫌一片未滿意竟思辱竭東江波徧頒寶物利天下懷瑜握瑾人無頗澄泥青鐵  
盡捐棄得此違復知其他對之如見骨髄士氣象剛懷殊煥嬰又如貞女肌理膩曷禁晨  
夕三摩挲揮毫灑墨倍奇快掃壁自寫幽人哦第慙書乏右軍聖何由籠取雙紅鷺嗟余  
抱硯老蓬華志違作頌賡猗那煙塵瀕洞暗天地隱憂文教淪尼軻安能草檄用茲硯淨  
洗兵甲傾銀河和君歌罷意激越人生那可長蹉跎

留題香巖寺

前人

松樹青蒼楓葉斑一筇重到亂峯間山佳難與僧醫俗雲靜應如我愛閒佛殿鐘聞猶躑  
躑仙臺梯斷未躋攀雪公塔畔多時立勝地何年再往還

歲聿云暮寒廬闌然與西岡閒拈數題以破羈悶

劉文麟

回頭枝上任春陽兼覺辭枝恨亦忘已見當時徧籬落不知何物是風霜雕鏤迹暗餘蟲  
篆蹴踏聲乾過鹿行莫道至今憔悴盡也曾小景著丹黃

稿葉

珊瑚玉骨暮寒時瘦石清溪短竹籬仙子不霑煙火氣俗工難寫雪霜姿無  
獨立偏禁

冷有鶴相看儘耐飢熱客見尋真一厄腸肥腦滿不相宜

癡梅

表裏終須澈底澈東風吹到力難勝漏穿已見生多孔窪坎猶能掩一層鏤更難成徒汲

汲履雖未及已兢兢禁他遮隔纔如紙下有寒蛟詎可醫

薄冰

空花轉眼漸寥寥客散梁園夢亦遙難管紅塵隨處起更禁白日幾回銷生添南浦波三

寸讓出東風路一條祇恨寒家春到晚尙將餘力壓芭蕉

殘雪

一幅銀光紙乍裁欣看表裏淨無埃儘添月色遮難漏倒捲風聲撲便回披讀頓宜幽客

坐對談無礙老雞陪山妻底事還鍼破要放梅花香進來

糊窗

松火茶煙滿座春撲階風雪不關身偶思沽酒呼童啓兼纘看梅任鶴巡繞室盤桓堪永

日停車剝啄是何人幾時移住深山裏雲鎖蘿封斷世塵

閉戶

石交也不耐霜風滿面冰漸澀未融爲我研磨貪夜詠累君熏燎作冬烘筆濡已得中書  
用墨燥終嫌下策攻爭似溫存宮袖捧殿前揮灑氣如虹矣硯

羊裘一領舊青袍百孔千瘡費剪刀剜剔豈能誇集腋彌縫差幸免吹毛客身已覺冬堪  
衛婦手爭禁夜尙勞莫笑黏連痕迹滿猶勝短褐繡波濤補裘

恭和霍儀閣夫子瀋陽書院感懷五言律四首嚴韻

張玉綸江

藹藹春風座融融大雅歌胸襟煥湖海文筆挽江河立品秋金鍊觀書月鏡磨留都式多  
士舊學那愁訛

高列扶風帳西家豈所安藥籠收馬勃戎服易雞冠燦燦花生筆團團日照盤愧參桃李  
隊翻益董帷寒

己寫泥金帖依然三徑荒功名今若此身世費商量水枉源頭活官成弩末強英雄空被  
賺我亦悔名場

濫竊前茅拔程門立愧遲鱗銜頻望雀馬組豈無絲衣鉢憑人託文章報主知挽留看臥

轍一任笑書癡

恭和霍儀閣夫子春雨嚴韻

前人

一枕春眠覺聲聲鳩亂催暖雲垂地重細雨隔城來酒記昨霄對花從今日開小樓閒佇望誰爲印蒼苔

恭和霍儀閣夫子春郊收馬行嚴韻

前人

一兩居然生象綠匝地勻鋪錦一幅萬馬新浴出水來沿堤鬻草聲斷續吁嗟羣馬劇可憐胡兒追逐肩毳氈羈勒不施真性全置散投閒年復年腹如鱗兮胸如虎羞同碌碌駑貽伍此中豈無腰褭姿捐金誰是千金賈泛駕情知氣太驕千里還思効一朝儻得王良執靶哀附輅佇看順風馳騁飄鴻毛身雖在郊原志豈忘鞍轡况今伯樂快相遭一顧懸知聲價貴君不見太行道上馬俯首鹽車夾股銜勒口自從知己淚一揮騰讓直逐天馬歸

恭和霍儀閣夫子見賜七律嚴韻

前人

幾年面目歎支離如此憐才恨見遲  
歐冶久稱能相劍卜商何幸許言詩  
瓣香心事思公屬浮世功名聽客爲  
所怕貽羞羊叔子艷豔爭笑翼雙垂

附賜詩春歸窗外草離離得友如君見  
恨遲太學早馳元伯譽盛唐爭誦曲江詩  
此才豈合終淪落有命從來任自爲  
分寸光陰須愛惜槐花彈指屋簷垂

上巳日同諸友人修楔於萬泉河口占

前人

蘭亭一集足千秋觴詠重看禊事修  
四十二人隨物化祇餘我輩對清流

勸君更盡一杯酒爲王若林翰作

前人

勸君更盡一杯酒無爲戚戚終日蹙眉  
帚請思四十年以前

若林年正四十

君我空空原非有即今

再閱四十年君我仍同歸速朽人生行  
樂須及時已過年華難再取擬園蔬剪  
畦韭歌拍肩笑撫手勸君更盡一杯酒

送廣福門之旅順

前人

福門之尊翁我齋先生調陞水師營協  
領福門將往隨侍同人多以詩餞者予  
撫今思

昔不能漠然於懷勉成七古一章聊以慰吹竽之隊而已

去年話別夏方五送我依依臨南浦今年聚首春未三謁君那忍停征驂見面殷殷先握手離懷爭話瀾翻口從茲定卜歡無涯好買青燈籌綠酒才與才聚天所愁暗催離數出奇謀阿翁忽拜遷官詔三品新銜鎮海侯鎮海侯專斧鉞簡書星火來倉猝公子隨侍當之官一鞭南指渤海月羌予素本善愁人一觸離思欲愴神况復今日與君別此愁真如花翻新與君相聚幾日耳一朝一別一千里豈必來往乏征鴻翻愁重惹離思起不須苦急挽鞭絲且向離亭手共持別後相思總無益何如臨歧立少時丈夫豈無數行淚那能灑向離別地忽然破涕爲君歡仰天大笑釋離思男兒讀書志大觀高山巨水搜求難不行萬里拓胸期讀破萬卷空闌珊史遷轍跡半天下崆峒涿鹿遊如厦做成卷軸積邱山共詫毫端奇氣瀉小儒拘墟頭戴盆讀書餽釘塞其門蹶泮蟻垤誇聞見蟲雕篆刻徒眊昏我聞阿翁官衙對渤海動則搖天靜涵彩長風陡起波濤迴應伴伯牙琴操改我聞隔海遙望即泰山際天湧出仙之鬢襟懷一擴小天下振衣千仞相追攀我聞霜秋水師當

知

大閱劍擊銀河甲攬鐵游水如陸詡神奇使舟如馬誇談謔公子素稱八斗才對此能勿  
心花開奮袂抽毫賦水戰力挽強弩聲轟雷千古才人紛無數擱筆不為水戰賦如天欲  
成王勃名孤鶩落霞待獨步吁嗟乎一別看君擅數奇人生那厭有別離笑他惆悵驪駒  
曲兒女情腸太可嗤

己卯赴試將行之前一日敬呈霍儀閣夫子三首

前人

已嫌立雪程門晚忍復長途策去驄未必錦標真屬我不堪芒屨竟辭公槐黃一路鞭絲  
雨柳綠重城蕙帳風千里迢迢隔警欵有誰親為破愚蒙

受知深處難為別未別先驚淚欲潛愛我拚教滄玉鑑報公終要覓金環登龍不限門千  
尺窺豹真慚管一斑從此夢魂難穩適勞他夜夜仰高山

登堂拜別神俱瘁絳帳從茲水一方縱使侯芭重載酒祇愁疏廣早還鄉  
兩遼風景成淒寂三晉雲山望渺茫沈瀝情緣何日再惟餘空爇后山香

恭記拜別時家大人庭訓五首

張玉綸

公已改就教職擬於  
五六月間回籍候選



此去二千里誰憐行路難叮嚀須憶着多紙寄平安  
尚有汝兄在無難甘旨豐放心前路去不必念家中  
寒暑兼饑飽誰爲防護周客中須自愛無使老人憂  
國士無雙品人爭羨汝才錦標應奪取急早賦歸來  
屈指歸期速重陽菊正黃賞花開小晏遲汝爲稱觴

過杏山塢山連山題

十載長楊獻賦身趨車此地往來頻山靈見我應含笑認得先生是故人

過長城弔蒙恬

璽書一紙本非真守節寧甘自殺身三十萬兵能不叛將軍畢竟是忠臣

雪夜懷人十六首

張玉綸

符象芝名芝錢塘人擅詩名談吐豪雅聽之令人忘倦藏書甚夥蓋不啻鄴侯萬架予  
每一過從輒繙閱竟日不能去也

遼海飄零日幾曠，寤於四壁富三墳。又添酒債因留我，數盡詩家祇讓君。風味六朝爭上下，筆花五彩足清芬。一宵話勝十年讀，此意憑誰寄暮雲。

王補樓名元成，性豁達，不事生產，得錢輒沽酒飲，爲人教子弟，有一言不合輒棄去，屢困躓，猶不改壬申歲會，共硯於本村僧寺，與予投契至深，雖屢有讒言，不顧也。

天馬從來慣脫繮，奇才自昔說王郎。一錢但有姑謀樂，四壁都無不悔狂。已許兩心嚴匪石，由他衆口鼓如簧。難忘蕭寺聯吟夜，覓句閒行繞畫廊。

劉餘臺名玉書，與予居相近，遇鄉試歲試輒偕行，每家居亦必相約數日，一過長談，或至竟夜不寐，與人言嘗譽予，不容口，近以家計拮据，遠村設帳，予又爲名場所役，家居日少，覺盛會寥寥矣。

十年追逐共悲歡，敢擬同心比蕙蘭。見面常愁今日短，憐才得如此人難。荒村夜雨梁懸榻，古驛秋風客據鞍。我困紅塵君絳帳，擁爐空憶話團欒。

徐菊坡名延年，復州人，美丰姿，好作狹邪遊，才思銳敏，每下筆輒頃刻萬言，丁丑歲與

予訂交於瀋水旅邸君嘗謂予我二人他日或一富一貧當割宅相住分隴同耕無相棄也

南州早見擅文名盃酒聯歡兩意傾幾見國風刪好色本來才子最多情江東詩思真無敵城北丰姿舊有評往誓至今猶感愧宅分同住隴同耕

恩鳳丹名詔滿洲棟鄂氏弱不勝衣又多病然其溺苦於學雖健壯者弗如嘗與予辨歷象星辰不合則同出庭心各指周天分野以爲證至夜闌乃止又嘗謂予今之讀書不爲科名計者獨我與君兩人耳戊寅夏一過其家環堵蕭然貧困特甚晏如也

常將風骨擬飛仙下筆文章萬選錢多病定應添藥債奇貧或至斷炊烟曾期著述同千古愴別音容又一年苦憶夜深談歷象空庭雙立共瞻天

李翌侯李玉年李持之名克勳克豐克盈兄弟也咸有詩名戊寅夏訂交於萃升書院每當予歸省輒舉酒大會諸同學爲予祖餞其依依款款之情在諸知交中實爲罕有

玉溪花萼有芳儀，階雨窗風繫舊思。千載襟期同命酒，一家兄弟總能詩。吟成池草寧關夢，話到濠魚更解頤。尙憶南歸叨厚餞，陽關三唱送行時。

得承齋名恩，漢軍董氏有文名。善騎射，每發必破的，不修邊幅，好脫帽露頂，得錢則謀一醉。戊寅春訂交於瀋水僧寺，逸才也。

滾滾紅雲一馬來，弓絃響處斷猿哀。讀書何止稱名士，投筆猶堪作將才。綽有逸風常脫帽，畧無暇日愛啣杯。程材自昔嚴刀尺，爲汝憑教闊幅裁。

王墨林名汝翰，才氣高傲，善歌謠，累試輒冠軍。共硯日，每得佳句，必走報牀下，相過必扃戶下鍵，或至夜分乃罷。

忘形爾汝兩靡佗，學舍相邀日日過。好句每先呈我看，新聲幾度喚君歌。一軍屢冠文名重，百尺能高意氣多。吐露襟期同促膝，談長忘問夜如何。

劉劍庵名先斗，性磊落，有異才。每文宗歲試，輒爲人代倩，得潤筆資爲沽酒費，飲或至嘔血而不肯已。謂予有傲骨，以恩鳳丹爲介，結僑札，歡己卯舉孝廉。

另眼獨將傲骨褒訂交快比飲醇醪從來名士皆耽酒自有英雄慣捉刀此日乍欣金作帖當年空歎紙生毛情深不畏雲泥隔更盼春風振翅高

多雲溪名隆阿滿洲舒穆祿氏才氣無雙不屑作三代下人物其不合於流俗有以也獨與予一見傾心有如舊契嘗謂人曰世路交情有如傀儡其獨存本來面目者獨張繡江一人耳此多某之所以誠服也

記從見面兩心傾此誼真堪託死生不作尋常酬酢語全敷心腹腎腸情百年事業風盤鶻一代才華浪跋鯨懷抱不殊忘誓約笑他車笠強要盟

德翼文名順滿洲富察氏與京人性沈摯善月旦評嘗謂人曰東都文運不振久矣能起衰者其張繡江乎予自惟謏陋豈敢當此厚望然其推許至情致足感也已卯夏訂交於瀋陽書院

一從鹿洞共班荆到處推袁愧此情力弱那能扶大雅學疎常怕盜虛聲忘懷共託雲霞契放眼誰堪月旦評驛使不逢空悵望梅花何自寄重城

劉敬亭名作肅性機警有詩才善談狐鬼戊寅春書院中有惡奴倜張君嘗擊却之共  
硯日每得酒輒相約共飲蓋無虛日也

訂交重認石三生風雨聯牀歲幾更羌我孤吟懷夢得有誰共飲勝公榮挑燈奇鬼談何  
壯奮臂狂奴胆尙驚惆悵別來經百日何時重續舊鷗盟

廣福門名壽漢軍張氏水師營協領平我齋先生公子也融融和雅讀書能數行下通  
十三經戊寅春訂交於瀋水僧寺每見予必拜於牀下一如司馬德操之與龐德公也  
翩翩公子足丰神奕才名邁等倫見我每修牀下拜對君偏覺座生春五車績學文思  
古千載論交氣味真南海人歸何日是幾回望斷馬頭塵

陳謙吉名克讓有雋才擅詩文名性謹飭與予交每作一夔已足想不喜飲酒然每與  
予遇輒舉爵無算予亦謹護之不忍使過醉也已卯秋予歸裝拮据君解囊相贈無吝  
色年甫二十有一

論交不比昔張陳石上從教證舊因擇友祇看交賤子問年真欲妬斯人酒緣遇我傾三

雅米爲逢君得一困回憶同車同硯日感離偏覺倍傷神

廣特夫名達漢軍張氏符象芝高足弟子也性豪邁貌極溫雅嘗習國書既而去之初事符象芝時嘗謂所親特百溪得張繡江爲友廣福門得恩鳳丹爲師皆我輩不可多得之快事予每羨之今得符象芝爲師可與相抵矣後得交予於符象芝座上其慶幸之情比之御李真不啻也

讀罷清書讀漢書藏修未肯負居諸得師快比分炎鼎交我歡逾御李車定擬文思當日  
上即論風度有誰如差堪報慰無他事強學還同識面初

特百溪名樸欽漢軍張氏詩才清警性剛銳有古烈士風戊寅之盟予忝首座君末座  
時人謂爲驥尾龍頭予與君亦咸自負謂能不愧此言故每一相見輒舉此語以共勗  
勉

幾回樽酒細論文鼻上何妨竟運斤舊稿再翻應憶我新詩初就每思君一天風雪迷清  
夜百里關河寄暮雲此日鑽研當更苦蘭膏試問共誰焚

贈董玉林二兄即跋繁露文集

張玉綸

全從六籍挹精華思幻風雲字迸霞我意固疑當有此古人復作又何加嚴霜斷制周良

史詠史百截  
極昭平允繁露淵源漢大家知否性頑頑如石點頭今始為天花

錦囊拾句愧王孫竟把高軒賺到門乍見直將傾抱負此來好與數晨昏留賓宿釀澆蒲

葉時丙午五  
月六日極我佳殺劇菜根莫訝相逢似相識三生恍記舊精魂未見先生時曾懸擬先生形似何若  
及一見果然豈三生石上有夙因耶

惠莊妙論伯鍾琴四海憑誰託賞音從此相思應共惹以前墜緒要同尋名山著述千秋

業爾室精研兩地心所惜得交當暮齒唾壺擊缺發長吟

儘能塗抹逞風流忍抱琵琶上別舟自是劉蕡甘落第何妨李廣不封侯行藏一任猜鬼

乙位置憑教呼馬牛結得芳隣遼海上雲龍韓孟足遨遊

遊千山書龍泉寺吐符應生四大字下

董琪樹玉林

君不見千華千峯聳如戟近接北鎮遠長白又不見龍泉之水降自天右引蒙古左朝鮮

憶昔前明中葉中側身東望夕陽紅遙知王氣起鴻濛搔首問天天不語但令喬嶽生申



甫生申及甫勢麟胸迸作霞光擁聖人當年覬覦誰家子大書磨崖字奇詭奇詭原將通  
帝謂隱括熙朝億載事不解之解會以神垂之萬古存其真

仿元遺山論詩絕句五十首 論明人

馬瑀林 西岡

聲容廣樂奏鈞天二鬼無端擬玉川畢竟犁眉遜覆瓿致身勳業退詩篇 劉青田

明月瑤臺奏鳳笙珊珊骨格逼人清五言傾倒朱長水主客圖須手補成 汪朝宗

五雲閣下之仙卿不顧高吟俗耳驚自作青邱歌一曲千秋位置早分明 高季迪

天機雲錦擅才華鐵笛歌成老鐵誇摘出七言濃麗語妙詞堪入浣溪紗 楊孟載

靜居五古學韋杜渾脫清圓法律精才力欲追高季迪就中雄放數歌行 張來儀

幽深精密似錢郎芳杜叢蘭襲暗香絕妙長篇工險韻未妨才氣遜高楊 徐幼文

結社南園倡嶺南五人傑出是西庵善言風景難移置集句天工人巧參 孫仲衍

珠林玉淵色高華祧宋禰唐擅作家終是唐賢臨晉帖欲求真意轉多差 林子羽

能探風雅無窮意始是乾坤絕妙詞 集中句 自道一生得力處何人敢詡解聲詩 方正學

志窮騷雅挽頽靡俗眼偏驚白燕詩數簡寥寥在野集冷然三歎有餘思袁海叟

入燕兩謁藏春墓自命風雲簡牘名拈出雲帆江樹句味參蔬笋氣冰清姚少師

青鸞八極獨翱翔氣吐胸中萬丈長自信能為有瑕玉興來肆意即成章解大神

臺閣雍容大雅才浮庸流弊卅年開有人憑弔忠良墓喜未三楊作誌來楊文貞文 敏文定

觸景攄情理趣真篇篇曲麗更清新秦淮夜月回心院至語由來最感人王孟端

解向廉夫拾唾餘狐精牛鬼一何殊除他倚翠偎紅語佳句渺如大海珠畢宗吉

楸樹山王力排鼻咏臬一首更恢奇分明韓杜張王手誰識勳臣武將詩郭定襄

唐取少陵晉取陶雕肝斲肺肯空勞笳吹鬢雪丹心煉詩品功勳一樣高玉裴敏

髻歲曾吟黎母詩中原遙數意爭奇眼前景物口頭語老去偏多率易詞邱瓊山

此翁大筆何淋漓獨寫千秋宏麗詞海水幾人見底裏弇州早歲妄嘲嗤李西泮

發言直道當時事邊計民生刻刻心力挽千鈞回元化有人低首成連琴楊文襄

蚤年伯仲孟襄陽晚作身名兩不減唾罵難禁憐惜意毒如孔雀有文章嚴介裕

兩家旗鼓各登壇復古功深祇一般相應相規轉相詆外間休怪解人難

李空同何大復

才雄氣逸推何李高韻深情鼎足留聲燄易時有銷歇方知江左舊風流

徐昌穀

趣生意外語清圓絕句應推歷下邊休說三君羞噲伍少年裘馬致翩翩

邊華泉

對山興致漢陂才詞曲能工衆口推自愛風流遠風雅詩家宗匠費疑猜

康德涵王敬夫

扶輪大雅一生心偏是名場恩怨深孔檜秦松挺蒼秀朱絃疏越有遺音

王子衡

上準風騷下沈宋清辭婉約興飛騰名流推獎諸生訓接迹空同恐未能

朱升之

北地信陽步後塵風流宏獎見天真當筵銷得楊郎曲敷藻抽毫無古人

顧華玉

太白山人幽逸姿烟霞邱壑見新詩瓣香黃九多奇崛妙處此心空自知

孫太初

石骨冰稜質不華少陵衣鉢愁無涯關中枉說十才子旗鼓中原當幾家

鄭繼之

清新綺縟擅辭場婉至篇多在永昌細擷南中行成稿江花江草總淒涼

楊升庵

古調西原近性情浚川衣鉢繼分明臨池倩女拈花笑風韻饒從別趣生

薛君采

沈思不減徐昌穀醉態如逢阮步兵深谷綿蠻發幽響五言尤自是長城

王稚欽

臨池點素畫書工詩格謙學放翁神采飄然兼愜當唐音宋語兩相融文衡山

巧於用短蘇門集五字佳篇仔細諳讀到微言獨至處恰如諫果味回甘高子業

羞從北地逐頽波選體唐風細揣摩五字沈吟詩品絕一家倡和雅音多皇甫子浚子 安子循子約

微吾長夜語殊夸積雪峨眉天半霞七字精光不磨滅千秋氣色總高華李子鱗

體具百家羅四部滔滔莽駭奇觀知音莫訝言夸誕大海迴風吹紫瀾末用集中句 王元美

不塑謫仙畫少陵淋漓醉墨賦春鐙絕交書是何人遺尙說交游憶李膺謝茂秦

蘭汀微弱方城薄子與明卿土偶同結社附名稱七子祇今疑是詞壇雄梁公實 宋子相 徐子與 吳明卿

高吟一首廬山雪諷寄微詞意可知獨愛蘇門廸功集伯仁好備火攻之王敬美

盤山絕頂見殘碣名將從無不解詩歸讀愚愚止止集悲風涼雨忽來時戚南塘

雪山銀海瀉秋濤本集句自命詩壇一世豪絃外餘音流不盡果然妙契在韋陶謝在杭

公安首起逞纖詭冷趣獨標有竟陵泗鼎將沉魑魅見挑燈展卷意難勝袁伯林 石公 鍾伯敬 譚友夏

茆簷孝子真才子性至情真一世稀絕妙好辭長水怨一篇孔雀東南飛魏子敬

風懷不減韓冬郎豔逸新柔字字香就使人心如鐵石也應一讀一廻腸

王次回

竟陵公安唱和頻閩風獨守絕纖塵素波皎月清輝別響逸思沉語語真

曹能始

臥子自是詩中龍力闢楚咻扶正宗萬斛珠璣霏咳唾一天星斗羅心胸

陳大樽

十歲論詩驚老宿捐軀十五早從戎行間颯颯悲風起纔擷南冠草未終

夏存古

變雅才兼正雅才詩魂長繞綠綺臺初雕嶠雅親書本萬餅黃金買不來

鄭漢若

晤劉仙樵丁酉

馬浮林

西岡

一折旗亭綠柳條匆匆別去總魂銷秋風落葉傷飄泊夜雨寒鐙伴寂寥詩句多從愁裏  
得名心漸向酒中消雲山太覺無情甚長隔成都萬里橋

憶昔同君旅舍時聯牀風雨短檠移棋低半子因饒客酒剩餘杯爲看詩論到真才九州  
隘生成奇氣兩心知祇今難說滄桑事零落人間沒字碑

蜀棧秦關驛路塵一春風送看花身青山久別縈歸夢白社重逢話舊因千里神駒應展  
足三年大鳥合驚人劉郎本是天台客此去桃源莫誤津

攜手何當上小樓餘觴同酌說閒愁半生交際成星散一別年光逐水流論價敢期高駿骨封侯幾見及羊頭無多大志空慚我落拓扶風馬少游

戲占

前人

室小齋名斗瓶敲酒注升戀花噴晚蝶飽肉妬秋鷹筆劣頑於僕門閒冷似僧何年鑽紙透飛去出頭蠅

朝發寶邸

前人

何似來時路風塵指顧間寒光龍港日秋色薊門山落葉紛無數浮雲不得閒到家須半月早慰老親顏

春夜

戊戌

前人

自問總宜休年光去若流道心紛俗務詩興闕春愁鑪冷香消篆燈昏月上鉤濁醪能醉我有夢尙清幽

夜讀仙樵詩草即題奇懷

前人

挑鐙重對一編新爲感離羣倍愴神略述論交偏愛我買書贈別解憐貧靈心曲折搜奇句豪氣淋漓籠古人如此才華今外吏循良知不負斯民

祈蠶詞

庚子

前人

雨後柔桑葉正肥馬頭祠下自虔祈低聲禱罷無人見檐外雙雙戴勝飛

初入千山

壬寅

溪山佳處引紅藤穿過白雲路幾層恰有峯巒如識我前身疑是此山僧指點奇峯面面來此行端足慰吟懷雲山到眼皆詩料打疊驚人小謝才

到祖越寺

兄西池先生攜門人讀書寺中

前人

參差塔影夕陽橫滿地青苔路不明剛是逢人欲問訊松間認得讀書聲

祖越寺曉起

前人

山寺深復深清晨足佳趣日欲上東峯紅葉明秋樹煙雲態變滅岡巒影錯互微見古潭邊驚起一鳥度有僧汲寒泉挈瓶自來去

振衣岡

前人

仙人衣五銖自來無污垢憐我塵中人雲際亂招手約我千仞岡撲盡塵三斗

三十三天

前人

坐井而觀天所見天亦小登三十三天階升詡奇巧奈何頭上天仍在蒼蒼表

游龍泉寺

前人

泉繞峯環夕照明到來心迹喜雙清解談家計僧偏俗接引遊人佛有情曲徑梨花無覓處滿山靈草不知名壁間虧有新詩句雜誦為余洗宿醒

石徑梨花寺之一景

龍泉西閣讀劉松雲杞曲史壁間詩

前人

僧牆字滿詩人少

用袁才子句

曾惹隨園一笑嘲今我來時甘虎啞讀君佳句勝蟲雕名山妝點

歸才子絕代風騷託下僚抄稿錦囊好收拾莫教化作五雲飄

西閣晚眺

傑閣層巒上登臨暮氣清疏鐘搖暝色殘葉聚秋聲霞染山容活煙吞塔頂平覓巢馴鳥



下窗外向人鳴

萬松亭

紅闌幾曲轉山腰滿地松陰路一條深壑寒濤清梵閣小亭秋影夕陽描有時雲氣閉窗  
入何客棋聲長日消底事打鐘僧得句驚他鶴夢醒中宵

前即寺  
之鐘樓

登五佛頂

上舊有石佛五今存其四老僧調言謂一佛飛昇去路絕處有松如梯攀而上予名之  
曰接引松

千山插天近北斗千山壓地隘九有千山山不必一千五佛一峯尤奇陡峯高不越五里  
餘我來自卯直至酉路方直上忽迴旋當面已絕復旁剖古洞鑿當山之腰中住羽衣虬  
髯叟松枝煮茗笑相迎留我小憇意殊厚遙指山送雨來吞吐溼雲亂張口巖底時見  
怒龍馳耳根祇聞風濤吼須臾雨過窮其巔蹠磴盤折洞夾右松生絕崖蒼雲梯真宰造  
物信非偶狹處攀蘿銜尾升前人趾礙後人首纔到峯頂最高處方知眼底縱有九百九

十九峯皆培塿彼四人者古先生似曾相識忘某某兩倚長松一枯座一個薜花生左肘  
聞道一佛獨自飛昇西天去安知不是再歷塵劫人世走儻證石上舊精魂未識於我有  
緣否我還一笑問爾佛祖接引之功能與崖下老松誰不朽

留別千山

前人

好山一半未全游草草桑林三宿留白石清泉蒼薜路跨驢欲去又回頭  
溪流鳴咽聲如怨峯蹙眉痕黛欲愁山水留人人自去夢魂爭不再來游

贈劉翁翁萊陽人

前人

斯翁意像似雷顛久著狂名衆口傳語未堪驚甘不作人皆欲殺我偏憐雄豪生有關中  
氣放浪家無郭外田解得秦觀持贈語自應一讀一流連

秦星五進士贈句云君子省  
身三自反哲人處事兩如何

燕燕篇丙午

前人

燕燕飛年年二月遠來歸故國飄零向誰訴天涯辛苦將人依客巢非故壘相依能幾時  
今年相依有故人明年相依知復誰嗟嗟燕兮燕兮爾既不能學沖天之鵬兩翼雲垂亦

當作鴻鵠之志一舉千里謝樊籬胡爲乎寄人檐宇下宛轉移徙空爾爲格格磔磔鳴聲  
悲嗟嗟燕兮燕兮爾勿鳴聲悲獨不見王謝高堂連雲起空餘野草沒斜暉人生總如寄  
世局有轉移今爾祇一微禽耳謀身何苦計羸虧爾還補爾巢哺爾兒青蟲聊亦有飽期  
况爾羽毛音黯淡不足當翡翠之飾軀骸微渺不足充鷹隼之飢任爾自來自去雙語雙棲  
飛翔柳巷徘徊花枝呼儔嘯侶主人不爾瑕疵而何嫌乎三間茅屋寄身之卑微嗟嗟燕  
兮燕兮世不有接肉烏守鼠鴟

有此氣方許作古詩今人之不能爲古詩者氣不爲之主也可以觀世變矣

仙樵

### 逃荒行

前人

歲在乙巳冬寒氣倍凜冽道逢逃荒人一見堪愁絕壯者負筐箱老者足跛蹙兒童涕洟  
垂婦女髮不櫛凍瘃面枯焦肘露衣懸結飢疲不能前十步一休歇問彼何處來作答聲  
屢咽故居海南頭連年遭水沒高田生蠹螾隰民餵魚鼈死者長已矣存者食虧竭撫卹  
恐無生徵歛尙急迫似聞寬大詔賑許太倉發粒米未沾脣竟爲貪吏設斗米錢十千何

以辨嗟咄草根煮無餘木皮食盡兀兒女鬻無門忍死還提挈側聞北邊中穀賤閒田闕  
敢辭蕩析艱聊用資存活稔知塞下人居處雜部落非族豈不畏且足救倉卒回首望南  
天鄉井長離別幸當還來歸否終異域歿言次兒號飢撫視淚溢血去去勿復道聞之悲  
心骨

淒風苦雨秋聲不可聞

子玉

北鎮廟瓦硯歌爲劉漱泉

石麟作

前人

劉郎示予古瓦硯厚寸三分長尺半其闊九寸重十斤聲銅色鐵縹碧爛穹脊瓢心古冶  
模背面首尾無銘讚識者知從北鎮來不須致疑魯鼎贗我聞瓦硯數鄴臺發墨蓄水功  
足冠錫花雷斧今已無祠瓦尤推穎陰灌其後興和之瓦亦不惡小簇花團致堪玩上溯  
蘭池未央數十種一一可辨秦與漢古色斑爛誠異物試以隄廉質乃賤此硯晚出洵良  
材文房可稱後勁嗟予嗜古苦寡識秦歟漢歟難懸斷對此茫茫發遙想陋儒杜撰恣  
欺謾云自虞帝封濬時此廟翼然美輪奐陶法尙屬河濱遺後遭兵燹墮溪澗沙埋土蝕

出人間四千年內星霜變姑妄言之妄聽之掀髯宜付一笑粲長日雞窗檢故編尋源討  
委情無倦開元之中致崇極古爵上公馨香薦契丹八部起營州李唐河山瓦解散煙塵  
坐見碧殿傾風雨幾經蒼鼠竄址蹶祀歇二百秋此瓦飄淪無人看當時藏書望海棠什  
襲應同列几案人皇去國浮海時或獨遺棄荒山畔嗣是金元屢加封王號貞德廟貌煥  
勝國之初正神名洪永成化數營建其瓦俱在無人收粗頑何堪當一盼惟有此瓦獨見  
珍手纔一握酥流汗苔疵幾點土氣凝研磨無聲雲數片殺墨竟如風驅之數日不散光  
黯澹儻入硯史硯譜中不須紫玉誇一段吾鄉久稱佳硯戴滑俱波濤光雷電安石枯松  
入水化綠端石產混同岸斯皆希奇世罕覩一拳索價高紀甌水櫃下墨質易朽浮金拒  
墨用難慣何若此硯如發硎揮灑十人可對面守護搗呵荷山靈珣玗何能名久擅曼翁  
硯林不曾載菟冊徧迫搜難徧弇山圖中亦未收倚撫珽玦遺璧瑗余生雅抱南宮癖到  
眼心喜等獵見巧偷豪奪吾豈敢強顏曲說濟貪念志士由來羞瓦全一半何妨佳句換  
毀方瓦合儒者行詩易龍尾例堪援製以金星之礪石切以錕鏃之快劍匣以琉璃之晶

瑩洗以清泉之漱灑作百年計凸勿平日三摹摹心不厭硯兮硯兮莫瞋字法不佳文不  
瞻屈汝來作塵窗伴縱不淬以筆鋒肆滂葩猶能墨潘淋漓姿吞嚙

長江大河一瀉千里其中仍有縈波蹙瀾之致求工於字句間者其如蝸鷄之於鯤鵬

乎仙樵

華表仙莊

前人

令威化鶴事記載異辭或云舊有石柱道觀即華表仙莊或云華表柱在鼓樓東謂今  
州城也或云一擔山即華表山今山在州城東七十五里上有石柱斧痕儼然好事者  
爲之無疑同人偶拈是題漫賦一章

欲尋令威宅步上東門道人民冢尙存柱無舊華表空傳歸來時勸人學仙早何如管幼  
安故井祇今好

觀漲

前人

誰挾銀河天上水橫衝直突苦無垠桑田指顧疑成海魚鼈噴跳若有神助虐更經三日

兩其咨孰又此州民狂瀾欲挽終難挽我是臨流怯渡人

大筆如椽仙樵

菊花

前人

荷謝蘭枯梅未胎就中天與巧安排他獨占三秋色對酒好開孤客懷風雨幾經神轉  
逸文章到老境纔佳秋容特許爲妝點休向芳時怨遇乖

一帶疏籬數畝園結隣祇有老松存開遲也慰栽培望秋盡纔知道化恩生具英華終發  
露淡如人意恰無言千秋細數誰知已惆悵西風五柳門

菊花詩蓋非五柳門庭中人不容妄作此詩足千古矣子玉

歉歲

前人

百二十日雨不止禾頭生耳船入市遼城西北數百里人民家家飢欲死道路傳聞賊蠶  
起並無富人羨哥矣往者歲在辛丑始數州禾稼沒秋水國家恩澤加無已錢米賑濟按  
食指病者以愈愁者喜况今奇荒更無比蠲租日日盼黃紙我州使君歌樂只忍見流民

盡逃徒早晚繪圖獻天子

詠淡巴菘二十韻

前人

一種多情草嘉名錫可觀靈根傳呂宋新值徧三韓味外味斯得煙非煙並看子疑罌粟  
細花比鳳蕉攢春雨分畦種秋陽曝葉乾微醺同小酌輒飽忘加餐食豈謝煙火香能沁  
肺肝氤氳資吐茹嗜好異鹹酸佳日詩纔覓長宵夢已闌良朋欣偶聚旅思未全寬得趣  
相宜久撩人小別難荷囊懸屨殺湘管攜琅玕玉手撻初出金絲簇一團石邊敲活火窗  
下敵新寒濃霧幻襟底蓮花生舌端清心堪代茗吹氣恰如蘭呼吸通靈液芬芳勝藝檀  
灰初霏雪白口尙嚼霞丹果否相思療能成不盡歡較量杯杓物二者孰先拌

自遣五首

前人

興來仰屋費吟謳日日門關簡應酬半世閒情寄筆墨四時佳趣足勾留僻題偶得邀人  
和奇句忽來刻骨搜表聖功勳問誰賞從他閉目還搖頭  
一樽濁酒一牀書長嘯清歌意自如敢分功名留竹帛且容蹤跡溷樵漁貧能行樂命俱



好志勿求多歡有餘放眼古今誰尙在世間不壞祇空虛

前人有此意見無此分明周市頭頭是道語仙樵鑄之小印管牀坐客已刺之佩囊矣

子玉

卅年骨性懶兼迂尙識今吾即故吾醉後渾忘長作客狂來忽自恥爲儒未教棗底琴書  
賣不管家中簷石無若悔謀生計太拙此身終是愚公愚  
平生屈指幾相知風義真兼友與師不速常來同月好每思便訪慰心期  
鐙前代酌雙存  
稿酒罷重完未決棋忽得遠書長跪讀殷勤恐我植身遲  
行李蕭條返故居蘆簾紙閣住相宜拚添酒債邀佳客自輯婦箴教女兒巷僻喜無車馬  
迹身閒偶得性情詩布衾夜夜不辜負睡到東窗日上時

管公屯

前人

墟里有人在清風萬古留重來覓故井不復見高樓友取卮原鶴化齊王烈牛同心論隱  
見易地武鄉侯

駐蹕山懷古

前人

草草豐碑記戰功，隋家覆轍幾相同。文皇終是英明主，末路能思田舍翁。

過古寺見曾石塘題名作詩弔之

前人

蕭然古刹劫灰寒，重讀殘碑剔蘚癥。枉說兵機占噪鵲，翻看民級賞仇鸞。三城定後功成

易，西市冤深佛救難。欲拜遺祠何處是，秋風幾度淚洑瀾。

曾公祠今無知其處者矣

劉烈女墓

詩小馬公神道指向陽寺馬文毅公先人馬文學墓而言

前人

北風誰言勁不撓，松栢枝嚴霜雖言酷不變。冬青姿有女，有女劉家姝。十五未有十三餘，女兒生長委巷裏。女兒生性明詩禮，里有虎肆憑陵可憐燕雀之弱。何以拒鸛鷹千方脅誘，女卒不膺。女心如鐵面如冰，朝瞰女兒門，暮瞰女兒門。女兒無父無母，祇有兄嫂難為言。決然一死留貞魂，尸香三日矣。官長致詰矣，奸人斯得狴戶命畢矣。一杯淨土埋玉骨矣，煌煌貞珉勒銘誌述矣。樹以松栢覆以冬青，不撓不變視此堅貞。迄今百七十年之遙，三尺之墳宰如也。與首山齊高西去數里有馬公神道。叶桂林霜隕大節獨操，忠臣烈

女同譽同褒聞其風者烏得以一小女子而歧視乎人中之豪吁嗟乎渴不飲盜泉水熱不歇惡木陰豈獨志士多苦心

和仙樵林亭夜坐韻

丁未

前人

露重苔紋膩風微煙樹昏涼少殊不厭坐久恰無言花氣襲人袂蟲聲出草根捲簾待明月緩緩酌清樽

和仙樵東園別墅作

前人

悠悠百年間幾人清福享勞生走熱場寡識嬰塵網我友不世情得境愜幽賞宅東有隙地構屋祗楹兩院花風弄香池荷露滴響客去仍閉關詩成欣撫掌暫來機慮忘久住天趣長何必深山深遐哉絕凡想

一派天籟

子玉

擬唐人邊詞五首

前人

烽火年年青海頭一聲羌管海風秋閨人遲作望夫石歸路行封萬里侯

路旁拾得舊刀槍，知是前朝舊戰場。一片黃沙堆白骨，模糊猶帶戰時創。  
一將功成萬骨枯，用成句千年燐火閃平蕪。黃昏應向髑髏問，知我玉門生入無。  
夜深朔氣透刀瘢，明月中天獨自看。忽見妖星光黯淡，將軍指日破樓蘭。  
紅旗風捲鐵衣穿，壯士長征已十年。聞有官家罷兵詔，一時喜氣動山川。

擬唐人宮怨四首

前人

枉費長門買賦金，仍無消息到于今。羞慚妾自無顏色，敢道君王恩不深。  
花片重重輦路埋，幾回欲掃卻徘徊。花殘似妾傷衰歇，翠輦多時肯再來。  
眉痕深淺鬪春山，攬鏡妝臺淚欲潸。若道承恩祇在貌，卻教薄命誤紅顏。  
殘花曾記昨朝新，失寵人原得寵人。敢恨峨眉善謠諑，好花原沒四時春。

自警

前人

此生得讀幾行書，敢怨埋頭作蠹魚。閒裏光陰須愛惜，少年習氣要銷除。事經悔後見何  
晚，學到深時心轉虛。蒼狗白衣紛變態，閉門人自不關渠。

孔王墓 在花園村北

前人

路繞藤梧歸旆長靈旗風捲瘴雲黃花園秋草年年綠寂寞無人弔孔王

傳在貳臣甲部

此日教誰歎可人當年苦戰際風塵拚將一具英雄骨博得姓名冠貳臣

豐碑高聳幾斜曛奕世猶彰死事動一樣桂林霜隕恨前年曾拜馬公墳 謂文毅公雄猷

西南身後地天昏禍接粵閩戰馬屯早遂十年首邱志不留老眼看三藩

春秋書法恕庸人弱女區區何足論翻惹詩翁來責備怪他巾幗負深恩 女四貞墓即在側四貞嫁孫延齡孫從逆王漁

洋漫興詩慘淡蒼梧野一首屠沽

投間起巾幗負恩深指其夫婦也

酬庸恤典無兒孫恩禮真堪感死生不有近郊三百戶誰將麥飯祭清明 守墓數百家可祭掃

讀數詩知天性自然也 仙槎

團練謠

前人

團練團練使我民心戰非盜賊之不畏更畏團練 一解 吏來吾村傳官府言早棄爾耒耜

警爾營屯團練團練可以弭盜賊可以遂雞豚 二解 家無麥菽人日窮蹙盜賊如毛官不

能捕逐官不能捕逐乃使我民捕逐三解吏貌猙獰酒食是營既醉既飽團練以成速斂爾民錢我明日其行四解史既去矣盜仍劇矣團練未善官乃怒矣盜擒捕矣民轉滋懼矣獻之官府需索益無數矣五解捕魚太擾水不能清捕盜太擾民不得寧愛以爲名法多弊生我州得賢使君盜賊本是良民六解

此詩不愧古人仙樵

真定弔顏太守

前人

河朔儻無十七郡祿山全力直趨秦能留西北收兵地同是君王未識人三寸舌成信國氣一身膽稱部中民如聞難弟誇名字叱咤猶堪懾賊臣

易水感成

前人

王曉坪庶常過易水題壁有句云事成願報知己恩事敗甘爲知己死予意不然特題其後

所謀囑勿泄出語一何鄙見疑及長者田光請死矣吁嗟乎借頭死折股死矐目死男兒

死舉大名耳豈爲區區燕太子

寥寥短章洋洋大觀也

子玉

贈別崔子玉

庚申

前人

昌黎崔子玉孝廉與予神交三年矣今秋枉訪約遊千山予以頭風遲遲行適海氛甚惡崔子竟不得遊而歸臨行賦長歌贈別兼招戴醜石山人來遊

崔子愛山兼愛友煙氛滿地關河走妻孥遮留鄰里誚掉頭行矣勿掣肘快如天馬脫羈韁來訪千山西岡叟西岡家住養花居奇峯一一列戶牖南去千山半日程遊山興早胸中有禽慶一旦遇向長把臂去去定恐後手扶鸞龍踢煙霞五佛峯頭作重九天風吹我兩詩仙驚人句誦詩千首事常快意少周防臨行賤體突有咎神山倏忽引迴風頭風苦我眩左右咫尺匡廬不可登咄哉俗塵難抖擻崔子歸興山色濃故鄉風鶴兵戈藪西望碣石頂上雲其下倚閭有老母今當戒途勿遲留悵望雲山呼負負崔子崔子胡爾然我有一言君記取熊魚自古兩難兼書生奇福爭消受既得快友又思山貪而無壓天肯狃

更問君歸幾時來君應俯首難分割留茲名山當左券重遊或勿鄉園守他年命駕慰相思我與山靈迎舉手特爲留此不盡緣造物於我殊不苟况謂看山似奇夢

見贈詩有看山好似逢奇夢之句或有帶花不折覺情深之句君激賞之

詩中語識良非偶好山夜夜入夢來夢山趣比遊山厚君賞愛花不折句

何至於山獨否否吁嗟乎奇山如貨奇可居炫價多將遠賈誘醜石山人與我亦神交君能致之同來我便忍病追遊死不朽誓將相從如斬驂安排裹糧挈榼酒遙屈千山作主盟平生言不忘要久阻君遊興罰我詩投君木李索瓊玖

擬古詩十九首

馬瑤林西池

攜手出郊郭揮手乃別離妾居地之角君去天之涯日暮悲風起思君君不知寒蟲懷春草倦鳥翔夕枝佇立望道遠垂涕攬衣緩黃沙暗千里家人何時返相送宛如昨忽驚蕙蘭晚妾顏能長好安惜青精飯

荏苒東南風婀娜吹楊柳娉婷朱樓女綽約依軒牖粲粲綺羅裳皎皎垂玉手郎爲冶遊子妾爲少年婦空閨偏獨棲離思安能守



丸丸高岡柏鬱鬱固磐石浮生能幾何天地一過客有酒胡不樂人情亮非薄命僕駕言  
邁飛轡入京洛京洛一何綺車馬聯如索東馳銅駝街西驅金谷宅逶迤南北宮樓臺數  
百尺遨遊恣心願曷爲自相迫

置酒讌歡友笙歌雜前陳燕趙多妖冶歌舞妙傳神四座識同願令德自有真援琴鳴一  
曲慷慨大志伸一唱庭過雲三歎梁飛塵人生且行樂寶筏渡迷津營營富貴者滋味良  
苦辛

高樓出塵表峨峨參天齊懸梯駕虹宇飛陛跨雲階中有一佳人絃歌清且悲爲問歌者  
誰恐是韓憑妻此曲安能顧臨風起徘徊一唱三歎息再唱七情哀不願傾聽久但憐屬  
和稀思爲雙黃鵠振翮凌風飛

上山採靡蕪下山採蘭草采采不盈掬綿綿思遠道故鄉歸不歸山高水浩浩離居今已  
久沈憂令人老

明月照庭隙蠨蛸挂簷壁天漢橫高秋繁星皎歷歷涼風吹岸柳吟蟬驚時易仰視鴻雁

飛噉噉安所適憶昔同心人雲路展鵬翮聲華富鐘鼎寒暄餘陳迹織女弄機杼牽牛服  
轅軛有名究無實出門望三益

翩翩孤飛鳥戢翼南山阿中有松與柏上施蔦與蘿總角結婚時燕婉兩相宜軒車望千  
里一水隔前陂相思已將老相見何太遲譬如豔陽花幾朝生光輝昨傷春梅飄今惜秋  
蘭萎願君崇令德妾又何怨爲

晚收饒芳蘭芳馨含碧滋薄言采其華感物懷所思惠風吹我衣美人知何之持此欲誰  
贈難忘同心時

西北望牽牛東南悵織女艷艷冶容姿盈盈顧空杼河漢廣幾度佇立淚揮雨嗟我兩無  
緣悔不莫相許一年一七夕渺渺人間語

客從邯鄲來驅馬洛陽道低徊荒臺下落日照秋草茫茫千載事觸目催人老興廢良有  
定何苦爭遲早我身亦如寄敢云延壽考生立三不朽自古奉爲寶

南山一何峻上與白雲屬嫋嫋秋風涼萋萋繁草綠寒景相迭更奄忽何其速客久歎時

滯宦老悲牛蹙胡爲戀名利此日自相束洛陽嬌女兒顏容美如玉當窗理紅妝撫琴奏  
清曲哀響馳高柱歌長節偏促四顧知音稀徘徊展芳躅願爲雙飛鳥奮翼棲華屋  
迴車東郭門驅馬北山墓古柏何離離蓬蒿沒荒路哀哉九泉下昏昏天長暮陰陽自相  
循大夢何時寤夜悲風前燭朝歌日中露人生亮非石安能壽永固求仙入東海凡骨難  
超度學佛登西天俗緣適自誤但有聖賢樂隨遇安吾素

古人長已矣今人更相親驅車涉長道遙望邛山墳石馬悲不嘶狐兔臥棘薪棠梨花開  
落那管行路人言旋我桑梓淹留亦何因

蜉蝣寄天地悠悠我心憂古人恨晝短秉燭更夜遊良以行樂時逝者無今茲被紈飲美  
酒吝者莫漫嗤海中三神山縹緲不可期

颯颯涼飈起蟋蟀吟何悲遊子萬餘里誰爲寄寒衣頽思就空牀衾枕與君違人愁知宵  
短蘭膏生暗輝忽聞車馬聲出門親結綬別離日已久又疑魂夢歸良人篤情好笑語入  
重闌願爲雙鴛鴦比翼不獨飛雞鳴神迂迂攬衣起四睇垂淚長太息明月照扁扉

漫漫冬夜長烈烈朔風慄攝衣步空階蛛網當戶列沈思仰高天望舒盈又缺南雁從北來遺我短書札長跪讀書札何以慰離別上有身無恙下有情難滅懷書在袂中終歲自細察

君知妾嗜琴遺妾一綠綺感君萬里意珍重聊復爾同眠合歡牀共覆鴛鴦被理絃絲纏綿把柱膠莫解欲彈相思曲誰能消遣此

明月皎中天清輝燭我幃披衣出前庭翹思獨徘徊關山隔千里哀雁翔南歸我行式微久離憂將訴誰迴身更延佇涼露下沾衣

重九同劉子叶衢果夫兄弟暨及門諸子棋盤山登高

棋盤山勢與天摩比高一切山皆矧相傳伊昔神人奕至今遺跡永不磨同人高會重陽節約我共登具白醴我本素有登高願聞之不覺舞婆娑忙佩茱囊着木屐攀崖躡磴捫薜蘿側足防危石回頭駭險坡仰看高峯巋巋而嵯峨吁嗟乎登山之難難於登天可奈何亦曰中道不可廢行行努力無蹉跎功到自然造其巔請嘗試之良不訛不然便是神

山可望不可接誰得蓬萊絕頂立高踈十丈以上步嶂開百丈以上瀑布拖徑至千千萬丈但覺脚底雲煙隨踢踰掌上星辰供摩挲登高登到無可登自知高到高不過其上寬不容萬衆來龍去脈相透迤忽起忽伏忽奔走如獅如象如駱駝山靈特地收霧翳眼中天地何么麼或分齊州煙九點或指蓬島雲一窠或憐人世沒紅塵或說桑田生白波若非身到神仙界那知洞天福地多我從絕險得坦途小坐片時心氣和掃枰間之木葉揩石上之苔窩果見棋子布滿盤渾如天上之星羅或疑漢家四皓坐談處何必常在商山阿又疑晉代二童來往地可有樵子斧爛柯甘將末着聊一試萬斛珠塵輸與他儻乘白鶴竟飛去焉知我輩非仙哥今日有酒須盡歡大家何惜醉顏酡團團席地開盛筵杯傳鸚鵡椀巡螺共學鯨鯢吞巨海羣嘲颺鼠飲長河客有興酣搗搗戰毒手尊拳各各槎喝日倒行三萬里一時降却萬古愁城魔其奈天公妬且苛大風吹雨急如梭恍值催租吏至敗人意直使劉郎題糕詩罷哦獨有落帽客狂頭自科掉來天外舞傴僂鞭電母兮叱風婆遺兩師兮大聲訶爲我速向廣寒宮殿報嫦娥來聽棋盤山上人高歌

遊羅漢洞

本名駱駝洞俗傳有羅祖在此出家

一登復一登高出白雲層盤路斜穿薜懸門倒挂藤秋風神案磬暮雨佛龕鐙終古真人  
事依稀問老僧

洞外下無地洞中上有天鷓吟羅漢偈狐學普提禪怪石雄於鬼癡雲懶似仙我來跌坐  
處不敢說塵緣

峭壁立嵯峨危欄瞰太和半崖留劫火萬木落長河霧氣蛇噴塔雷聲虎吼坡數章詩草  
草留贈石槃陀

重九遊棲雲寺

何處覓仙蹤雲山重復重人隨猿拾果僧放鶴棲松苔繡前朝碣煙沈古刹鐘興來無遠  
近更上最高峯

醉倒菊花樽四圍山色昏昏僧歸明月寺客散夕陽村林靜飢狐立泉乾渴虎奔是誰扶我  
去鐙火讀書園

秋草四首

步王漁洋秋柳原韻

前人

亭長亭短總銷魂，望斷平蕪綠到門。  
一帶羅裙春日色，六朝金粉夕陽痕。  
黃榆樹外牛羊道，紅荳花間蟋蟀村。  
獨立寒塘多少恨，離離風景與誰論。

半天殘照半天霜，繞郭連村接野塘。  
瓦控不敲童子鼓，金釵空鎖小姑箱。  
烟波南浦懷江令，風月西湖弔鄂王。  
記否牧羊坡下路，賴多點綴杏花坊。

曾記長隄綠映衣，匆匆往事已全非。  
愁生南浦新腔換，夢醒西堂好句稀。  
吳苑祇今麋鹿臥，越臺依舊鷓鴣飛。  
明年猶有踏青日，寄語王孫信莫違。

天涯何處不堪憐，一片殘陽萬點煙。  
簫弄江南山隱隱，笳吹塞北路綿綿。  
王孫遊去空千里，公子歸時又一年。  
回首鄉關風景晚，蕭蕭班馬夕陽邊。

疊前韻

前人

幾日池塘返夢魂，忽驚秋度玉關門。  
拾來翠卸裙腰色，踏處青留屐齒痕。  
舊雨相思紅豆國，春風小別綠楊村。  
此中生意今何在，重待濂溪仔細論。

楊柳隄邊一片霜含情惆悵立寒塘紅心寫徧裁詩板綠意歌殘記曲箱太社諸陵悲漢  
帝靈巖幽徑悼吳王蒼茫千古榮枯事愁說當年牧馬坊  
春香冉冉襲人衣九十春光舉目非楚國王孫辭宛轉謝家公子夢依稀青驄陌上匆匆  
去黃蝶園中欸欸飛前度芳情曾記否至今莫便寸心違  
紅情綠意總堪憐種種風流化作煙金谷園中情脈脈銅駝陌上恨綿綿楊花白板家千  
里杏子黃衫客十年寄語牧兒休弄笛有人立馬暮山邊

柳絮四首

前人

短長亭子望蒼茫柳絮飛飛過古牆雪影溟濛新院落風光澹蕩舊池塘一羣鴨唼隨流  
水幾個鶯囀入夕陽爭奈天涯懷別處東西不定太顛狂  
短長亭子不勝春無限晴光轉綠蘋隋苑自隨風舞慣謝庭偏擬雪飛頻可堪青眼逢君  
日愁殺白頭送客人寄語沾泥泥不染禪心何處悟前因  
短長亭子總銷魂點點離人別淚痕輕逐馬驕芳草路亂翻鴉背夕陽村詩聯南里烏衣



巷夢醒東風白下門試問章臺畫眉客回頭煙月幾黃昏

短長亭子去何之一任東風不自持陌上情懷芳樹惱路旁心事落花知紅欄橋亞晴飛雪白板門遮暗漾絲却羨化成萍點點浮蹤總傍鳳凰池

辛卯冬月初十日于小瀛辭歸山左留宿太平山塾賦以誌別六首

我來太平山端爲讀書誤半生不得志鬱鬱與誰訴憶昨解行裝意外與君遇與君甫通欸知君亦傭僱公然兩人心一見便如故君恨相見晚道我來何暮性情日以親來往日以屢豈意十餘月君忽懷內顧諒我同病人誰能當岐路西南指海雲東北悵遼樹

君爲辭我歸惠然肯來即山行六七里雪深兩三尺蹒跚入我室移時喘方息淪茗傾一甌言次日西匿爰留君信宿君云辦裝亟強之不可留詭言讓君極猛虎踞深澗駭狐竄叢棘魑魅瞰行蹤出入實叵測四山寂無人夜色窈以黑呼燈向東壁罡風吹燄仄聳肩犯側寒對話促宵刻

命酒上胡牀悲歌志激烈寶劍掣三尺唾壺擊全缺文章憎薄命衣食困豪傑擲揄被山

鬼頻笑謀生拙一身墮塵網劫灰寒詎熱我正而立年本根懼易折感君帖賜歐勵我硯磨鐵方樂新相知旋悲生離別照見離別心一片關山月

纖月沉閣西杯盤已狼籍萬籟寂沉沉蟋蟀鳴古壁欹枕擁短衾寒燈照琴席寶此燈火光醫得勦睡癖相會在何年相聚在今夕今夕形影親明日雲山隔垂涕復無語起坐手加額晨鷄胡不仁窗外呼格格

驪歌亂人意須臾便分手草草薦宿盤更勸一杯酒君今從此辭明春早回首煞星犯驛馬我命君知否不怨君不來但愁我他走君當先著鞭我去良不久仰視鴻雁飛影沒窠窩口

豈不慕君文直逼西江派苦無逸學地少小事行邁鵬程九萬里圖南甚矣憊先路君力導下風我甘拜陳言嫌贅瘤俚句慚擁疥敢布區區心植身俾無壞勤修仰仙桂熟養防蕘稗功名有早遲英雄甚成敗請君遺藥石留償相思債

小園幽居

前人

大梁河北小遼西舊賃房園草草棲柳絮池塘春戲鳴桃花籬落畫鳴鷄兒攜小鎡培瓜  
醜妻抱長瓢灌菜畦讀罷離騷無個事閒翻書架覓詩題

*[Faint bleed-through text from the reverse side of the page, including characters like '大梁河北小遼西' and '醜妻抱長瓢灌菜畦']*